

William Marrion Branham

---

# Musanjeela

---

Kadi mu matuku a dīyì dya mwanjelo wa mwandamutekete...

Bwakab.10:7



# CIKEBELU

---

1 MUPROFETA?

5 MULAYI WA MUPROFETA  
MU MATUKU A NDEKEELU

10 NTWADIJILU

14 BIDIMU BYA MBANGILU

27 DIKUNJI DYA KAPYA

34 MAALU MASOKOKA MABUULULA

40 MYABA YA KUBALA

Voice Of God Recordings, Inc. mmudimu wa bwambi udi kauyi wa cyena mangumba mwikale udifila bwa ditancisha dya Evanjeeliyo wa Mukalenge Yesu Kilisto. Disambila dyetu ndya ne kakanda aka kiikale dibenesha kûdi wêwè ne kakupe dyumvwa ditambe bwîmpè dya dîbà dya ndekeelu ditudi ne mwoyi edi.

# MUPROFETA?

**M**u Bible, Nzambi uvwa misangu yônsò utwadila bantu baa pa buloba Mukenji Wende mwikale upicila anu kudi muprofeta wa cikondo aci. Wakaakwila ne Môsà mu cipuka cilakuka kapya ne wakamutuma ne mudimu wa kuya kapatula beena Ebelu mu Ejipitu. Dikunji dya Kapya divwa dimweneka ne mèsù ne bimanyinu bikwabo byakafidiibwa bwa kushindika mudimu wende wa bwambi. Yone Mubatiiji wakatwala Mukenji mwikale ulongolola baa pa buloba bwa Maasiya uvwa ne cya kulwa. Pavwaye mwikale ubatiiza Mukalenge Yesu mu Musulu wa Yadene, Dîyi difumine mu Dyulu dyakashindika mudimu mutuma naawu Yone wa kuleeja Mwânà wa mukooko wa Nzambi ne: “Ewu m’Mwanaanyi munanga, udi uNsankisha bîmpè.” Paakapita bidimu, Dîyi dya Mukalenge e kumvwika cyakabidi diikale dyakula ne muprofeta paakaakulaYe ne Pôlò mu Bukênkè bwakamufomija, ne paanyima dyakamutuma ne mudimu wa kuteekaye ekeleeziya mu bulongame. Kuumukila eku ne eku kwa Dipungila Dipyadipya ne Dikulukulu, kacya Nzambi katu mwanji kwakwilaku ne bantu Bende ku ndongolwelu wa cyena mangumba anyi bulongolodi kampanda bwa ntendeleelu nansha. Yêyè utu anu wakwila ne bantu ku muntu umwepele: muprofeta Wende. Nenku Yêyè uvwa ushindika baprofeta aba ku bimanyinu bitambe mfukilu.

**Kadi twămbè bishi bwa leelu ewu? Nzambi ucitu ubuulwila baprofeta Dîyi Dyende anyi? Kucidi kabidi bimanyinu bitambe mfukilu anyi? Nzambi mmufwanyineku kutuma pa buloba muprofeta wa matuku a cyena leelu aa anyi? Dyandamuna ndya ditambe kutooka tòò ne:**

**“Eyowa!”**

Kadi netumanye munyi paajuuka muprofeta? Neikale mufwanangane ne cinyi? Neënzè maalu mushindu kaayi? Neatupe cimanyinu kaayi? Neùjè Mifundu kaayi?

Baprofeta baa kale bavwa bantu baa Nzambi baa bukitu, ne kabavwa ne bwôwà bwa kukandameena malongolodi a ntendeleelu to. Bwa kwamba menemene, bavwa misangu kana yônsò babamba mambavi kudi balombodi baa ekeleeziya. Eliya wakeela malongolodi a ntendeleelu a mu dituku dyende kadyombo, ubakonka ne Nzambi uvwaku mwa kuneemeka mulambu wabo bôbò, anyi wende yêyè. Kwelabo mbila. Kwambabo biprofeta. Kutupikabo biikale basambuka cyoshelu. Kuditapabo mputa ne twele. Kadi Nzambi kaakabumvwilaku to. Eliya kutangila mu Dyulu kwamba ne: “Bimanyike leelu ewu ne wêwè ngudi Nzambi mu Izaleela, ne mêmè ndi musadidi webe, ne ndi mwenze bintu byônsò ebi ku dîyi dyebe.” Pashiishe yêyè kuloksha kapya mu Dyulu bwa kwoshaku mulambu. Miika muprofeta wakakandameena Mfumu wa Izaleela, ne kasumbu kajima kaa baakwidi, paakadyulaye Mwakwidi Munene Zedekiya bwa ciprofeta cya mashimi cyakambaye. Mwakwidi Munene kumutapaye dipi mwîsù ne Mfumu kumwela mu buloko bwa bulelela bwakambaye. Nansha Mukalenge Yesu pende wakakinyiibwa kudi malongolodi a ntendeleelu a mu dituku Dyende mu mushindu wa ne baakaMupoopela pa nkuruse pamwe ne benzavi baa babyâbâbyâlè. Piikala maalu malonda mwa kushaala anu malelela, muprofeta uvwa mwa kukinyiibwa kudi ndongolwelu wa cyena mangumba wa leelu ewu, ne bavwa mwa kumutwa mênà a mwabuludyanganyi, muprofeta wa mashimi, anyi mabi mapite awu. Kadi Nzambi uvwa mwa kwimana ku luseke lwa musadidi Wende.

**Bu kwôkò mwa kwikala muprofeta mu matuku etu a cyena leelu aa, mmunyi muvwaye mwa kwitabiibwa kudi Ekeleeziya wa Katolike? Ekeleeziya wa ba-Baptistes? Ekeleeziya wa ba-Luthériens? Anyi dingumba kana dyônsò edi?**

Mukalenge Yesu mmutume aba bônsò badi baMwitabuuje ne mudimu ewu ne: *“Nenku bimanyinu ebi nebifile badi biitabuujja; Mu dîna dyanyi nebiipate badémons; nebaakule myakulu mipyamipya; Nebakwate nyoka ne byanza; ne bôbò banwe cintu cidi cishipangana, kacyakubenzela bwalu nansha; nebatentekele babeedi byanza, ne babeedi nebasangale.”* (Maako 16.17-18). Mufundu ewu mmulelela leelu ewu anyi? Piikalawu kawuyi mulelela to, Mèyi a Mukalenge akajikila mudimu dîbà kaayi? Mu Bible mujima, baprofeta bavwa ne bukole bwa kwondopa babeedi, kwipata badémons, ne kwenza bishima. Môsà wakateeka nyoka wa cyamu cya kabanda kumpala kwa beena Izaleela bwa kubondopa ku lulengu lwa mênù a nyoka (Nomba 21.9). Naamana, mwena Suuliya wa bukole, wakalwa kudi Elisha bwa yêyè kwondopiibwa ku nsudi (2 Bakalenge 5.9). Paakakuluka nsongalume mukwabo ku dididiishi dya nzubu wa kuulu ne kufwaye, mupostolo Pôlò wakamujingila maboko ne wakaalujja mwoyi mu mubidi ukaavwa mufwe awu (Byenzedi 20.10). Tudi anu ne mulubu wa bidimu 3½ bya mwoyi wa Mukalenge Yesu, kadi mu biine bidimu bikese menemene abi, Yêyè uvwa anu wenda wondopa babeedi. Bampofu baakatabala. Beena nsudi bakondopiibwa. Bampudimaci baakumvwa. Balema baakendela kuulu. Disaama dya mushindu wônsò dyakondopiibwa. (Maat. 4.23)

Nzambi uvwa kabidi ushindika baprofeta bende mu mishindu mikwabo pa kumusha dyondopa. Nansha maalu masokoka menemene mabuta mu mwoyi avwa amanyika kudi bôbò bantu baa Nzambi aba. Mfumu Nebukandeneesa wakaloota ciloota cyakamutacisha, kadi kayi mwa kuvuluka kabidi muvwaci to. Muprofeta Danyeke kwawila Mfumu awu ciloota ciine aci ne kumwambilaye ne ciprofeta cyakalonda (Dan. 2.28). Kakuvwa civwa cisokome kudi Solomo to paakalwa Mukalenge mukaji wa ku Sheba kumpala kwende. Yêyè uvwa mûle tente ne Nyuma mu mushindu wa ne wakamwambila nkonko ivwaye naayi mu mwoyi wende kumpala mene kwa kumwelaye yöyi (1 Bakalenge 10.3). Elisha wakambila Mfumu wa Izaleela byônsò bivwa Mfumu wa

Suuliya mulongolole bwa kwenza, too ne mêtî mene avwaye udyambidila mu nzubu wende wa bulaalu (2 Bakalenge 6.12).

Ku byenzedi byende Yêyè mwine, Mukalenge Yesu uvwa misangu yâbûngî uleeja ne Nyuma wa dijingulula ewu utu n’Nyuma wa Kilisto. Wakajingulula ngiikadilu wa Natanaela paakambaYe ne: “Monaayi bushuwa mwena Izaleela, mwena munda mudi kamuyi budimu!” Nenku Yesu kutungunuka ne kwambila Natanaela mwaba uvwaye usanganyiibwa paakamwambila Filipino bwa Maasiya (Yone 1.48). Paakamona Natanaela ne Yesu uvwa mumanye mwoyi wende, wakajingulula dyakamwe ne Yêyè ke Kilisto. Musangu anu wa nzanzanza uvwa Yesu mumone Peetelo, Wakamwambila dînâ dya tatwëndè, Yona (Yone 1.42). Peetelo ke kumba kulekela byônsò ne kubangaye kulonda Yesu matuku ende ônsò akashaala a mwoyi. Yesu wakatuutakeena ne mukaji wa beena Samaaleya ku ciinâ cya mâyi ne wakamwambila bwa mpekaatu yende ikaavwaye mwenze. Mêtî ende a mbangilu avwa ne: “Mukalenge, ngaajingululu ne wêwè udi muprofeta” (Yone 4.19). Bantu bônsò basatu aba bavwa baa bipidi bya nsombelu bishiileshiilangane, cibi baakajingulula Yesu dyakamwe paakaleejaYe dipà dya dijingulula.

Dipà edi dyakajimina paakafundabo dibeji dya ndekeelu dya Bible anyi? Piikalabi ne bishima ebi mbifundiibwe bitooke too mu Bible, bidi penyi leelu ewu? Muprofeta wa dituku dya cyena leelu’s udi mwa kushindikiibwa ne bishima.

**Nzambi wăpù bantu Bende mwoyi anyi? Ucidi kabidi ne bukole bwa kwondopa babeedi anyi? Ucidi wakwila neetu ku baprofeta Bende anyi? Kuvwaku umwe wa ku baprofeta mudyanjile kumona dituku edi anyi?**

**Kudiku biprofeta bicidi ne  
cya kuula anyi?**



# MULAYI WA MUPROFETA MU MATUKU A NDEKEELU

Mêyi a ndekeelu menemene adi mafunda mu Dipungila Dikulukulu adi afile mulayi ewu ne: **“Monaayi, nênnùtùmìnè Eliya muprofeta kumpala kwa dilwa dya dituku dinene dya MUKALENGE didi dikwacisha bwôwà: Nenku neakudimune myoyi ya baataatu bwa kuyitangija kudi bânà, ne myoyi ya bânà bwa kuyitangija kudi baataatu baabo, bwa ncilu kubutula buloba ku mulawu.”** (Maal. 4.5-6)

Dituku dinene dya Mukalenge didi dikwacisha bwôwà dicide dilwa, pa nanku bikengela tukebe muprofeta Eliya ne meeji etu matooke ônsò. Mu Bible, baprofeta kabavwa balwa kudi malongolodi a ntendeleelu avwabo biitaba kudi bantu bàbûngi to. Bavwa balwa kudi basungula banyaabanya. Elaayibi meeji tûng ne bu muprofeta wa Maalaki 4 awu mwa kulwa, cibi kumupangilabo. Twâmbè tûng bu yêyè mwikale mufwanangane ne baprofeta baa kale, ne anu dyanza dya bantu kumujingululabo? Piikala muprofeta ewu ne cya kwalukila mu dituku dya ndekeelu, netumanye munyi? Dyandamuna ndimweke patooke mu Mifundu. Yêyè neikale ne ngiikadilu wa muprofeta. Neamanye maalu masokome a mu mwoyi. Neênzè bishima. Malongolodi a ntendeleelu neakebe bwa kumudyombola. Kadi nekwikale basungula banyaabanya badi bamujingulula bu musanjeela mulaya wa dituku edi.

**Netumanye munyi paalukila Eliya? Ngiikadilu kaayi yaleejaye bwa twêtù kumujingulula?**

Eliya uvwa muntu wa mu cipeela. Bimanyinu binene ne maalu a kukema bivwa bishindikija mudimu wende wa bwambi. Uvwa uyiisha ulwishangana ne maalu mabi a mu

dituku dyende. Wakayiisha nangananga mwikale ulwisha masandi a Mukalenge mukaji Izabela. Paakambwibwa Eliya mu dyulu mu dikalu dya kapyà, nyuma wende wakapona pambidi paa Elisha. Bimanyinu binene ne maalu a kukema ke kwikalabi cimanyinu cya mudimu wa bwambi wa Elisha pa dîbà adi, ne wakayiisha pende mwikale ulwisha mpekaatu ya baa pa buloba. Baprofeta aba bubidi bwabo bavwa baditole biikale bayiisha balwisha malongolodi a ntendeleelu a mu dituku adi. Bidimu nkama bimane kupita, nyuma umweumwe ewu wakaalukila pa buloba munda mwa Yone Mubatiiji. Muprofeta Maalaki ngwâkadyànjila kwamba ne Eliya nealukile bwa kuleejaye Mukalenge: “*Monaayi, nêntumè musanjeela wanyi, ne yêyè nealongolole njila kumpala kwanyi...*” (Maalaki 3.1). Yone Mubatiiji uvwa anu bu muvwabi ne nebyenzeke mushindu awu bu muvwaye ubiikila bantu ku kanyinganyinga munkaci mwa bânà baa Nzambi. Anu bu Eliya, yêyè wakayiisha mwikale ulwisha mfumu ne malongolodi a ntendeleelu a cyena leelu. Mukalenge Yesu wakashindika ne Yone Mubatiiji uvwa muprofeta wa Maalaki 3 mu Mukanda wa Maataayi (11.10) ne: “*Bwalu yêyè ewu, ke udibo bafunde bamba ne: Monaayi, ndi ntuma musanjeela wanyi kumpala kwebe, wîkala mwa kulongolola njila webe kumpala kwebe.*” Luuka 1.17 udi wamba ne nyuma wa Eliya (Elias) uvwa ne cya kwikala mu Yone Mubatiiji: “*Nenku yêyè neaye kumpala kwende mu nyuma ne bukole bya Elias, bwa kukudimuna myoyi ya baataatu bwa kuyitangija kudi bânà.*” Kadi tangilaayi bîmpè ne citupa ciibîdi cya Maalaki 4 cicivwa ne cya kuula: “*...ne myoyi ya bânà bwa kuyitangija kudi baataatu baabo, bwa ncilu kubutula buloba ku mulawu.*” Aci citupa cya Mufundu necyenzeke kumpala kwa Dilwa Diibîdi dya Kilisto.

**Bidimu binunu bibidi paanyima paa Yone Mubatiiji, dîbà ndyedi dyâkûmbanyi kabidi bwa nyuma wa Eliya kwalukilaye pa buloba.**

Dituku adi dyafiki! Mu cikondo eci, tudi bamone nyuma wa Eliya mwalukile. Mmwele kadyombo ku ndongolwelu wa cyena mangumba. Mmukandameene mpekaatu ya baa pa buloba. Mmuleeje bimanyinu ne maalu a kukema bûngi kabuyi kubala. Mmuyiishe Bible ku mwaku ne ku mwaku kuumukila ku Genese too ne ku Bwakabuulwibwa. Muprofeta wa Maalaki 4 awu mmulwe anu mwakalayabo, ne mmutwale Mukenji uumukila ku Nkwasa wa butumbi wa Nzambi wa Bukole bwônsò. Dîna dya muprofeta mwine awu didi **William Marrion Branham**. Tutu tumubiikila ne “Mwaneetu Branham.”

“William Branham, ûmvwà mêmè ewu munange ne mwitabuuje ne mmuprofeta wa Nzambi.” Oral Roberts, mutangadiki mwende luumu wa buloba bujima ne mwibaki wa Université Oral Roberts.

“William Branham wakalwa kutudi bu muprofeta wa Nzambi ne wakatuleeja mu bidimu bya cinunu ne nkama citeema ebi bintu bimwebimwe menemene byakatuleejabo mu Evanjeeliyo... Nzambi mmusambe bantu Bende, bwalu muprofeta munene mmujuuke munkaci mwetu.” Dr. T.L. Osborn, mutangadiki wa beena Mpenta ne mufundi wa dipoko.

“Kumpala kwa kusambidilaye muntu, yêyè uvwa mwa kwanji kwamba kantu ne kantu anu mu kôkò pa bivwa bitangila masaama a muntu awu, ne kantu ne kantu kabidi pa bivwa bitangila nsòmbelu wende=cimenga civwaye musòmbele, midimu ivwaye wenza, byenzedi byende—mene too ne maalu a pacivwaye mwânà mutekete. Kacya musangu wende nansha umwe Branham kaakatupakanaku mu dîyi dya dimanya adi munda mwa bidimu byônsò bîmvwàku nende abi nansha. Ciine aci ncyangate, bwanyi mêmè, binunu bya maalu.” Ern Baxter, mutangadiki, mulongolodi wa Tumpanye twa Branham munda mwa bidimu mwandamutekete, mwikale kabidi umwe wa ku balombodi baa nzanzanza baa Mouvement de la Nouvelle Église Britannique.

Kacya anu Mukalenge Yesu Kilisto wendela pa buloba ebu muntu nansha umwe katuku mufile bwenzeji pa baa pa buloba mu mushindu wa ndondo nanku to. Kuumukila ku ntwadijilu wa bupwekele mu kazubu kaa cibambalu cimwe mu mikuna ya mu Kentucky, too ne ku Amarillo, Texas, kwalu Mukalenge kumwangata kamufila Kwabo, nsòmbelu wende uvwa ku musangu ne ku musangu mumweneshiibwe ne maalu matambe mfukilu. Ku bulombodi bwa Mwanjelo wa Mukalenge mu cidimu cya 1946, mudimu wa bwambi wa Mwaneetu Branham wakapatula kantolantola kaa mudilu kaakateemesha kapya mu cipungu cijima cya matabuluja manene a dyondopa akatangalaka eku ne eku kwa Amerike too ne mu nyungulukilu wa buloba bujima. Too ne leelu wa Ndaaya ewu, mbamumanye kudi bafundi baa maalu malonda a bwena Kilisto bu “taatu” ne “muleeji wa dikàsà” wa ditabuluja dya dyondopa dya mu bidimu bya 1950 dyakashintulula Ekeleeziya wa cyena Mpenta ne dyakajuula nkwaka wa groupes Charismatiques mu mushindu mutumbuke menemene, udi leelu ewu mwikale ne bwenzeji pa dingumba ne dingumba dyònsò dya cyena Mishòònyì. Nansha nanku, anu bu muvwabi ne nebyenzeke mushindu awu, mangumba adi àkèèka malongesha ende ne abenga kwitaba mudimu wakamutumabo naawu.

Kwònsò kuvwaye uya, Nzambi uvwa ujaadika ne Mwaneetu Branham mmuprofeta mutumina lukongo elu. Anu muvwa Yobo, Mukalenge uvwa wakula nende mu mvunda. Anu muvwa Mòsà, baakamona Dikunji dya Kapya dyenda dimulombola. Anu muvwa Miika, bavwa bamwamba mambavi kudi balombodi baa bitendeleedi. Anu muvwa Eliya, uvwa muntu wa myaba ya cipeela. Anu muvwa Yelemiya, wakatumiibwa ne mudimu kudi Mwanjelo. Anu muvwa Danyelee, wakamona bikeena-kumona bya maalu acivwa alwa. Anu muvwa

Mukalenge Yesu, uvwa umanya maalu masokome a mu myoyi. Ne anu muvwa Pôlò, uvwa wondopa babeedi.

Mukalenge mmulwe cyakabidi kusamba bantu Bende kupicila ku muprofeta. Mu cikondo cya maalu malonda cya mîdimà mitambe bukole, mudi nsòmbelu wa maalu mîmpè mushaale wa ciipanshi muye too ne mu ndondo mu mushindu wa katuyiku banji kumona kacya to ne bingoma bya kabutu byenda bitundubuka ku ntengu ya buloba, muntu wa bupwekele kutumiibwaye ufumina mu bwikadi bwa Nzambi bwa kubiikila cisa cidu cìpùnga ne lufu bwa kubafikisha ku kanyinganyinga.

Muyiidi munanga Yone ufundile bwa Mukalenge Yesu ne:

*Nenku kudi kabidi bintu bikwabo byàbûngi bidi Yesu mwenze, biine abi, bu byôbì bikengela kubifunda ku cintu ku cintu, ndi ngela meeji ne nansha buloba bwine kabuvwa mwa kupeta mwaba wa kuteeka mikanda ivwa ne cya kwikala mifundiibwe nansha. Amen. (Yone 21.25)*

Cintu cimwecimwe eci tudi mwa kucyamba bwa nsòmbelu wa Mwaneeetu Branham. Kudi mayiisha makwata pa mikaba mapite pa 1.200 mwikale musanganyiibwa binunu bya maalu adibo balonde pa nsòmbelu wa muntu wa bukutu ewu. Nyewu tucidi anu batungunuke ne kuumvwa majaadiki a bwenzeji bwende pa nsòmbelu ya miliyô ne miliyô ya bantu. Kakanda aka kî nkafwanyineku nansha kufika ciibwîpî ne kwamba cikuma cidu muntu wa Nzambi ewu mwenze pa bantu baa pa buloba to.

# NTWADIJILU

“Paakandelabo mu kazubu kakese kaa ku mikuna ya Kentucky mwamwa, Mwanjelo wa Nzambi wakabwelela ku dididiishi e kwimana mwaba awu. Ke Dikunji dya Kapyra adi.”

Nsèsà ya kabundubundu icivwa anu ibangilaku ditubula mîdimà ya dyulu dya citaleela dya ngondo mwinâyì. Dididiishi dya mabaya dimwepele adi, kuunzulukadi bwa kubwejaku bukênkè bwa dinda mu kazubu kakesee kaa cibambalu cimwepele aku. Kanyuunyi kakunze mu cyâdî kàvwà kiikile ku luseke lwa dididiishi aku kwenzaku anu bu ne mbakasalule mu mushindu wa pa bwawu mu dinda diine adi ne kavwa kimba bisulusulu byamba kutaayika. Munda mwa kazubu amu, nsongalume Charles Branham kwelaye byanza mu cinsalabeeta cyende cipyacipya ne kupwekeshaye mèsù bwa kutangila mukajende wa bidimu 15. “Netumwinyike dîna ne William,” mwakamba taatu awu.

Ke Bukênkè butambe mfukilu kubwelelabu ku dididiishi aku. Bukênkè kusambuluka cibambalu e kulwa kulembelela kumutu kwa kalaalu kavwa mwânà uvwa ufuma ku dilediibwa awu. M’Bukênkè bumwebumwe abu bwakapatula bâna baa Izaleela mu Ejipitu. M’Bukênkè bumwebumwe abu bwakatuutakeena ne Pôlò mu njila pavwaye uya ku Damaseke. Ne Bwôbò ebu mbuvwa mwa kutungunuka bwa kulombola mwânà mukese wa mu diboko ewu bwa kubiikilaye Mukaji musela wa Kilisto bwa kupatuka mu baa pa buloba. Bukênkè abu kabuvwa cîngà cintu to anu Mwanjelo wa Mukalenge, Dikunji dya Kapyra; nenku Dyakamwenekela bantu musangu ewu kabidi.



Mwaba wakalelelabo William Branham, Burkesville, KY.

Nenku mwômò amu, mu kazubu kakese aka kaa mici, mu dinda adi dya matuku 6 a ngondo mwinâyi, muleleshi kuunzululaye dididiishi bwa bukênkè kutookeshabu munda amu bwa Maman ne Papa kumonabo mmwenekelu ûmvwà nende. Ke Bukênkè bwipacila musaamu ku bunene kubwelelabu ku dididiishi bwenda bunyunguluka. Kwenzabu cijengu mwaba ûmvwà awu, e kupwekabu pa kalaalu. Bantu ndambu baa ku mikuna bavwa biimanepu. Bavwa beela mbila mikole.

Nzubu mumweke wa bupwekele ewu uvwa mu mikuna ya ku sud wa Kentucky, pabwîpi ne kaacimenga kakese kaa Burkesville. Matuku a ngondo avwa 6 a ngondo mwinâyi, 1909. Mwânà ewu uvwa wa kumpala pa bânà dikumi bavwa ne cya kulediibwa kwa Charles ne Ella Branham.

Abidi mmale asatu mmîpi ke Mwanjelo wa Mukalenge kulwa kumwenekela cyakabidi William Branham.

Pacivwaye mwânà, Mwanjelo wakanji kwakula nende, wamba ne neikale ne cya kusòmbela pabwîpi ne cimenga civwa dînà ne New Albany. Kubwelaye mu nzubu e kwambilaye mamwëndè civwa cifuma ku

dyenzeka. Anu mùtù maamu wetu yônsò ewu, kayi utuma meeji menemene ku bwalu bumulondela abu to kadi kumulaadikaye mu bulaalu bwa kumutuuyishaye cilunji cyende cya bwânà aci. Paanyima paa bidimu bibidi, dîkù dyabo kumwangala e kuya ku Jeffersonville, mu Indiana, ku ntanta wa kilomeeta mikese cyanaana ne cimenga cya New Albany civwa lwa ku sud wa Indiana.

Mwanjelo kwakula kabidi ne muprofeta wa kânàkânà ewu paanyima paa ndambu wa bidimu. Muvwa mmu dituku ditalale dya ngondo wa citeema kwikale muunya wosha bikole bu muvwa dîbà dituma nsèsà yadi mu mabeji makunzubile a muvù wa automne. Kansongalume aka kavwa kenda katebuka bu muvwako kambule tumbekeci twa mâyi kenda kapweka ne kajila. Uvwa muswike cizubu cya ditala mwinshi mwa mwânankàsà uvwa ne mputa bwa kumulama ku lupwishi. Ke kusòmbelaye panshi bwa kwikisha mu dileji dya mucu muleemule wa cilombalomba. Binsonji bivwa bimumutunkumuka mu mèsù bwalu uvwa udila mwadi bu muvwaye udimona bu mwena dyakabi: Balunda bende bavwa munkaci mwa dicyonkomoka ku dijiba dya mwaba mwine awu kuvwabo baloba mishipa, kadi yêyè pende bamulame anu bwa kusunyina papa wende mâyi. Dyakamwe, cipeepele kubanga kutuuta mu mucu awu kuulu kwa mwaba uwaye awu. Ukupula ku mèsù kadi kujuukilaye kuulu. Kuumvwaye cyona cya mabeji anyunga ku cipeepele aci... kadi kakuvwa cipeepele to. Wambulula mèsù nunku, pankacinkaci lwa muulu mwa mucu wa cilombalomba awu, cintu kampana ciikale cinyungisha mabeji mûme awu.

Dyakamwe Dîyi kwakuladi ne: “Kunu maala anyi mfwanka anyi kukooyishi mubidi webe mushindu kana wônsò to, nekwikale mudimu wa wêwè kwenza pawakola.” Kansongalume kaa bidimu mwandamutekete



aku kakwacike bwôwà kulekelelaku tumbekeci ne kuvukuta lubilu too ne kuvwa mamwăkù.

**Anu muvwa muprofeta Samwele, Nzambi kwakula kabidi ne mwânà.**

Kupita mbingu ndambu, uvwa munkaci mwa kunaya màábî ne mwakunyende wa balume. Kudyumvwaye cintu kampanda cya pabwaci cimwikile. Utupula mêsù utangila ku Musulu wa Ohio e kumonaye cilamba cilenga cya dikema. Bantu dikumi ne basambombo kuponabo ne kufwabo paakasolola cilamba aci pa musulu awu. Muprofeta wa kânà ewu ke pamweneye cyende cikeena-kumona cya nzanzanza apu. Kucyambilaye mamwëndè, ke ewu yêyè kufundaye byakamulondelaye abi. Paakapita bidimu, bantu 16 kuponabo ne kufwabo pavwabo munkaci mwa kwibaka cilamba cya Second Street mu Louisville, Kentucky pa Musulu wa Ohio.

**Mukalenge uvwa umuleeja bikeena-kumona bya matuku acivwa kumpala. Anu bu baprofeta baakamudyanjidila, bikeena-kumona abi kabyakapangilaku kacya to.**

# BIDIMU BYA MBANGILU

Mu wende nsômbelu yônsò, Mwaneetu Branham uvwa anu ujingajinga kwikala myaba ya cipeela. Paakakumbajaye bidimu 18, kuumukaye mu Indiana e kuya ku mikuna ya mbwebwe ya kudi dîbà dibwelela. Disômba dyende dya mu Arizona kadyakanenga ntanta muleemule to kumpala kwa kwenzejiibwaye bwa kwalukila.

Dingà dituku mêmè kwangata dipangadika dya kupeta mushindu wa kukosoloka ne dibiikila adi. Mvwa mupatuke ngenda nya kudi dîbà dibwelela bwa kwenza mudimu mu ferme kampanda. Mulunda wanyi, Nzambi's mmunene kwine kwônsò aku anu bu mudiye mu mwaba mukwabo wônsò ewu. Anyisha ubweleleku ku dilabula dyanyi mêmè edi. PaakubiikilaYe, wâMwitaba.

Dinda kampanda dya ngondo wa citeema wa cidimu cya 1927, mêmè kwambila maamu ne mvwa nya ku lwendu lwa kuya kenza cituudilu ku Tunnel Mill, kudi bule bwa miles dikumi ne inaayi [kilomeeta ipacila ku makumi abidi ne isatu] kuumukila ku Jeffersonville kutuvwa basombele musangu awu. Nkaavwa mumane kulongolola lwendu lwa kuya ku Arizona ne balunda baanyi bakwabo. Paakalwa maamu kupeta kabidi luumu lwa kûmvwà, ncicivwa ku Tunnel Mill to, kadi nkaavwa ku Phoenix, Arizona, ngenda nyeema Nzambi wa Dinanga awu. Nsombelu wa mu ferme kwikalaye mwîmpè bwa cikondo kampanda, kadi abidi mmale asatu mmîpi ke yèyè kuntodaye, anu mùtù disanka dikwabo dyônsò dya pa buloba edi. Kadi Nzambi atumbe, anyishaku ngâmbè mwaba ewu ne, dilabula ne Yesu ditu dyenda dishaala misangu yônsò ditwe nsukaadi kadiyi ditondaku to. Yesu utu wafila ditalala dipwangane ne busambi misangu yônsò.

Misangu yâbûngî nkaadi mumvumvwe cipeepele cituuta mu mici mileemile ya pins. Bivwa anu bu ne mvwa mwa kuumvwa Diyî Dyende dibiikidila lwa kule mu diitu, dyamba ne: “Adama, udi penyi?” Mitooto ivwa anu bu ne ivwa mipwekelele mu mushindu wa uyikwata ne byanza. Nzambi uvwa anu bu ne uvwa pabwîpi menemene.

Cintu cimwepele citù cimweka bu ne cicidi cingambila maalu âbûngî too ne leelu ewu pa bidi bitangila ditunga adi mbibeeba

bya mu cipeela. Wêwê mudidinge mupambuke mupatuke mu cibeeba, udi ujimina anu bipeepele nunku ewu. Misangu yâbûngî beena ngendu ya dibandila dya myaba batu bamona tuubilongo twa mu cipeela kadi kuumuka mu cibeeba bwa kuya katutuula. Batu balaluka mu cipeela too ne mudibo bakajimina ne mîngâ misangu bafwa bwa nyoota. Ke mudibi kabidi mu njila wa bwena Kilisto—Nzambi utu ne cibeeba. Udi ucyamba mu Yeshaayi, nshapita wa 35. Badi bacibiikila ne “Cibeeba cya Cijila.” Misangu yâbûngî bisankasanka bya pa buloba bitu bikukoka bikulalula kule ne cibeeba. Dîbâ adi wajimiji dilabula dyebe ne Nzambi. Mu cipeela paudi mujimine, kutu mîngâ misangu kumweneka mâyi a bakishi. Bwa bantu badi munkaci mwa kufwa nyoota, mâyi a bakishi awu neikale bu musulu anyi dijiba. Misangu yâbûngî bantu batu banyeemenaku ne bakadishindamu kadi basangana ne badi anu munkaci mwa dyowa lusenga lwa mudilu. Mûngâ musangu dyabulu udi ukuleeja cintu kampanda cidiye yêyê wamba ne ndipicisha dya kapeepe. Cidi anu mmâyi a bakishi cyanaana, ncintu cidi kacyi anu cya bushuwa to. Wêwê mwambe ne uciteeleje neudisangane ukaadi udinowela tunyinyinganya pa mutu webe awu. Kumucyuku yêyê awu to, wêwê mubadi muswibwe. Itabuuja Yesu utu wafila mâyi a mwoyi kudi aba badi ne nzala ne nyoota.

Dîngâ dituku mêmè kupeta mukanda mumfundila ufumina kwetu mwikale ungambila ne umwe wa ku baakunyi baanyi baa balume uvwa usaama bikole. Uvwa ng’Edward, mwakunyaanyi uvwa mundonde munyima. Mu bushuwa bwa bwalu ncivwa mwele meeji ne disaama divwa ndya dikole to, pa nanku mêmè kwela meeji ne neŭmvwè anu bîmpè. Kadi diloolo kampanda paanyima paa ndambu wa matuku mêmè mwikale ngumukila mu cimenga mpicila lwa ku nzubu wa cidiilu wa ferme, mêmè kumona dibejî dya mukanda pa meesa. Mêmè kudyambula. Bavwa bambamu ne: “Bill, patukila lwa ku mpâtâ wa ku nord. Mbwalu bwa mushinga mukole be.” Pângââkamanâ kubala kabeji aku ke mêmè ne mulunda wanyi kampanda twètù kuya lwa ku mpâtâ mwine awu. Muntu wa kumpala ûngââkatuutakeenâ nende uvwa mmulami wa diitu mukulumpe wa ku Texas uvwa wenza mudimu mu ferme mwine awu. Dyende uvwa Durfy, kadi tuvwa bamwinyike dînâ ne “Pop.” Uvwa ne kwîsù kubungame paakangambilaye ne: “Mwanaanyi Billy, ndi mukutwadile mukenji wa dibungama.” Pa dibâ diine adi ke mfumu wa keetu kasumbu kulwaye mwaba utuvwa awu. Bôbô

kungambila ne mukenji ucivwa ufikilaku ku nshinga mwikale wamba bwa lufu lwa mwaneetu wa balume.

Mulunda wanyi munanga, ngâkanji kushaala katanci too nciyi mwa kunyungaku to. Civwa ndufu lwa musangu wa mbedyambèdi bwa mu dyetu dikù. Kadi cîndi njinga kwamba ncyà ne meeji a kumpala akamvwila avwa ngaa kumanya ne yéyè ukaavwaku mudilongolole ku lufu anyi. Ndi mwenze anu nkudimuka bwa kutuma mèsù ku luseke lukwabo lwa mpàtà awu uvwa wa kàlaabi, binsonji kadi kuntunkumuka bimpwekela pa matama. Kadi ke mèmè kubanga kuvuluka mutuvwa nende twadikuma eku twadikuma eku patucivwa bânà bakese ne mushindu mwine uvwa maaluu matukolele.

Tuvwa tuya mu kalaasa katuyiku ne kantu kiine kaa bushuwa aka kaa kudya to. Bânà baa nkàsà mu bisabaata bapatuke pambelu ne tuvwa ne cya kuvwala nkooci mikulakaji milamakaja ne mpengele lwa ku nshingu eku bu mutuvwa katuyiku tuvwala miteelu to. Ke mèmè kuvuluka kabidi dituku dikwabo divwa Maamu mwele ndambu wa matala makanga mu kambekeci bwa didya dyetu dya mundaamuunya. Katuvwa tudiila kaaba kamwe ne bakwabo bânà to. Katuvwa ne mushindu wa kupeta byakudya muvwabo bóbò naabi to. Tuvwa misangu yònsò mwa kuditapa e kuya lwa pamutu paa kakuna bwa kadiilapu. Ndi mvuluka dituku diine ditwakapeta matala makanga adi kadi twètù kwela meeji ne ncyà kudya cyebe cya dinoono eci. Pa nanku bwa mèmè kutwishiibwa ne mvwa ne cya kupeta wanyi ndambu wa matala awu ngâkapátuka kumpala kwa nkankala, mèmè kwangata dyanyi dyanza kumpala kwa mwaneetu awu kwangataye wende ndambu.

Nenku pângààkashàlà mwimane mwaba awu ne mèsù matangija ku mpàtà awu uvwa muunya muumishe, ke meeji aanyi kuyawu ku bintu byònsò abi, nenku mèmè kudikonka ne Nzambi uvwa mumwangateku mumuteeke mu kaaba kimpè menemene anyi. Ke Nzambi kumbiikilaye cyakabidi, kadi anu bu pa ciibidilu ke mèmè kwenza mwanyi mwònsò bwa kucilwisha.

Mèmè kudilongolola bwa kwalukila kwetu bwa dijiikiibwa dyende. Révérend McKinny wa Port Fulton Church, muntu udi bwanyi mèmè anu bu taatu, paakayiishaye diyiisha dyende dya ku citalu adi ke kwambaye diyi dya ne: “Kudi mwa kwikala bamwe bantu mwaba

ewu badi kabayi bamanye Nzambi to, byòbi nanku, mutekemenaayi mpindiyewu.” Kaa, kadi ke mèmè kuupukila nkwasu ûmvwà musombele, Nzambi nguvwa wakula naanyi cyakabidi. Mubadi muswibwe, paabiikilaYe, wâMwitaba.

Ncyadyakupwaku mwoyi mwakadilabo kudi Taatu wanyi ne Maamu bakulakaje bakwate ne bya luse paanyima paa dimujiikabo adi to. Mvwa nkeba bwa kwalukila kudi Dibà Dibwelela kadi maamu kunsengeleelaye ne mwende mwònsò bwa mèmè kushaala, ke ndekeelu wa byònsò mèmè kwitaba bwa kushaala bu mèmè mwa kupeta mudimu. Ntanta mukese naka mèmè kupeta mudimu ku Cyapu cya Midimu ya Mbulamatadi wa Indiana, kùndi mwangaciibwe ku mudimu mpindiyewu ewu.

Paakapitaku bidimu bitwe ku bibidi, mèmè munkaci mwa dikenketa ma-compteurs mu ditanda dya ma-compteurs mu Cyapu cya Gaz cya mu New Albany, ke gaz kumbwelayi mu dyùlù, nenku cyòci aci kunsamisha munda mwa mbingu. Mèmè kuya kudi bangangabuka bònsò bâmvwà paanyi mumanye abo. Nciyi mwa kupetaku diikisha nansha. Mèmè kusaama cifu, cijuula kudi bwenzeji bwa gaz ayi. Disaama ke kubangadi dyenda dikola misangu yònsò. Kuyabo naanyi kudi bangangabuka baa dimanya dya pawadi baa mu Louisville, Kentucky. Ndekeelu wa byònsò bòbò ne civwa nkalaalaala, nenku kwambabo ne bivwa bikengela kumpanda. Mèmè ncivwa mwa kuciitabuuja to, bwalu ncivwaku ne cintu cinsaama lwa mu luseke lwanyi emu to. Bangangabuka

kwambabo ne kabacivwa kabidi ne cya dingenzela to anu bòbò bampande. Ndekeelu wa byònsò ke mèmè kwitaba bwa kucyenzabo kadi mwikale nsuminyina bwa kuntwabo bwanga bwa dibenga kunsamisha pa mwine mwaba awu bwa ngaamona mwa kwikala mbandila padibo bampanda apu.

Kaa, kadi ke mèmè kujinga bwa muntu uvwaku mumanye Nzambi ikale mungimanyine ku luseke. Mvwa ngitabuuja mu disambila kadi ncivwa mumanye mwa



kusambila to. Pa nanku mwambi wa mu Ekeleeziya wa Kumpala wa Ba-Baptistes kuyaye naanyi mu cibambalu cya dipandangana.

Mbenze anu bangumusha ku meesa awu baya naanyi mu bulaalu bwanyi, mêmè kudyumvwa ngenda nteketa ngenda nteketa dibà dyònsò. Mwoyi wanyi ukaavwa kauciya utuuta kabidi bikole to. Mêmè kuumvwa Lufu lungikile. Mweyelu wanyi kubanga ukaadi wenda ukeepa dibà dyònsò. Mêmè kumanya ne ngaafiki kundekeelu kwa njila wanyi. Kaa, mulunda wanyi, indila's wànjì ufike pa mwine mwaba awu, ke paakuvwila meeji a bintu byàbùngì byùkaadi mwenzenze abi. Mvwa mumanye ne kacya ncivwaku munwe mfwanka, munwe maala anyi mwikale ne biibidilu kampanda bya bukooya to, kadi mvwa mumanye ne ncivwa mudilongolole bwa kutuutakeena ne Nzambi wanyi to.

Mulunda wanyi, wèwè mwikale anu mwena ekeleeziya naka wa mmwenekelu wa kwisùkwisù wa mukwate mashika ewu, neukamanye pawafika kundekeelu ne kwèna mudilongolole to. Pa nanku, piikalabi ne ke cyebe cyònsò cyùdi mumanye pa bidi bitangila wanyi Nzambi ewu, ndi nkulomba anu mwaba ewu bwa uye ku binu ulombe Yesu akupe dilabula adi dya Dilediibwa dya cyakabidi, mwakambilaYe Nikodeme mu Yone, nshapita 3, kaa, ne ngonga ya disanka's neidile. Dinà Dyende ditumbe.

Mu cibambalu cya lupitaadi aci mwakabanga mwenda mwenda mîdimà byenze anu bu mu diitu dinene. Mvwa mwa kuumvwa cipeepele cituuta mu mabeji, paaci cyumvrika bu civwa kule menemene mu diitu. Ukaadiku pàmwàpa mumvwe dituuta dya cipeepele cikole ciikale cituuta mu mabeji, ciikale cyenda ciseemena cyenda ciseemena mwaba ùdi. Mêmè kudyambila mundamunda ne: "Ee, ke lufu lukaadi lulwa kungangata elu." Kaa! Bivwa bikengela musuuka wanyi utuutakeene ne Nzambi, ke mêmè kuteeta mwa kusambila kadi nciyi anu mumanye mwa kusambila to.

Cipeepele cyenda ciseemena, cyona cyenda cibanda cyenda cibanda. Mabeji adila bu makasa, dyakamwe mêmè muye.

Kumwekabi dibà adi bu ne nkaavwa mwalukile mushaale cyakabidi mwànà mutekete ku makàsà kutupu, mwimane mu kajila aku mwinshi mwa mucu umweumwe awu. Mêmè kuumvwa diyì dimwedimwe dyakamba ne: "Kunu maala nansha mfwanka"

adi. Ne mabeji âmvwà ngumvwa awu avwa amweamwe a bwena akatuutabo kudi cipeepele mu mucu awu dituku adi.

Kadi ewu musangu diyì kwamba ne: “Ndi mukubiikile kadi kuyi muswe kuya to.” Kwambululadi nanku musangu mwisâtù.

Apu nanku mêmè kwamba ne: “Mukalenge, piikalabi ne ngwêwè, anyisha ngaalukile pa buloba nenku nênyiishè Evanjeeliyo Webe mwimanyine pa misonga ya nzubu ne mu masangu a misèèsù. Nêngâmbilè bantu bônso bwa bwalu abu!”

Paakamana kupita cikeena-kumona eci, mêmè kumona ne ncivwaku muumvwe bimpè bya menemene to. Ngangabuka uvwa mumpande awu ucivwa anu mu nzubu amu. Wakalwa kuntangila kadi kupapukaye. Uvwa mumweke anu bu uvwa wela meeji ne mvwa mwa kwikala mumane kufwa, ke kwambaye mwaba awu ne: “Mêmè ewu ncitu muntu utu uya mu ekeleeziya to, búngì bwa bantu bàtù bàntancilà mêmè mbunene be, kadi ngajingululu ne Nzambi ngudi musambe mwànà wa balume ewu.” Cyakambilaye diyì adi, ncyèna mumanye. Muntu nansha umwe kavwaku mwanji kwamba bwalu pa bidi bitangila cyôci aci to. Bu cikondo aci mêmè mwikale mumanye bindi mumanye mpindyewu ebi, mvwa mwa kwikala mujuuke mu bulaalu abu ngenda ngela mbila ya Butumbi bwa Dinà Dyende.

Paanyima paa ndambu wa matuku ke bôbò kumpa dyanyisha dya kwalukila kumbelu kadi mêmè mucikàle anu nsaama ne mwenzejiibwe bwa kwikala kuvwala binete ku mèsù bu mucivwawu amona bitaayitaayi. Mutu uvwa unnyungakana pâmvwà nshaala mutangile cintu mutanci.

Mêmè kupatuka kuya ngenda nkeba bwa kupeta Nzambi. Ke mêmè kwenza ngûmuka mu ewu ekeleeziya ngâya mu ekeleeziya mukwabo mwikale ntata bwa kupeta mwaba uvwa mwa kwikala dibiikila dya ku cyoshelu dya mu mushindu wa cyena kale. Cìvwà cyenza dibungama ncyà ne ncyakapetaku mwaba nansha umwe to.

Mvwa ngambamba ne bu mêmè mwa kwikala mwena Kilisto, mvwa mwa kujinga kwikala anu wa menemene. Mwambi kampanda wâkangumvwa ngamba diyì adi kwambaye ne: “Mpindyewu wêwè mwanaanyi Billy, neuye kule too ne ku Dikolesha dya maalu.” Mvwa anu ngambamba ne mêmè mudidinge mupete ntendeleelu, mvwa muswe mmuumvwe padiye ulwa apu anu bu mwakamuumvwabo kudi bayiidi amu.

Kaa, Dîna Dyende ditumbe. Mêmè kupeta ntendeleelu pashiishe ne nyewu ncidi anu nende, ne ku dikwacisha Dyende nêmmulamè tootooto.

Diloolo kampanda mêmè kuumvwa nzala yâbûngi ya Nzambi ne ya dilabula dilelela mu mushindu wa ne ngâkapâtuka kuya lwa ku cisaasa cya kale lwa kumfundu kwa nzubu ne nâkateeta mwa kusambila. Ncivwa mumanye mwa kusambila mu ciine cikondo aci to, ke pa nanku mêmè kubanga patupu kwakula Nende anu bu mûndi mwa kwakula ne muntu kana yônsò ewu. Dyakamwe kulwaku bukênkè mu cisaasa amu, kwenzabu nkuruse, ne diyî kupatukiladi mu nkuruse mwine amu ne kwakuladi naanyi mu mwakulu ûmvwâ mêmè nciyi mwa kuumvwa to. Pashiishe bwôbù kuumuka kuyabu. Mêmè kushaala bu mukwacike ku nzembu. Pângâalu kupingana mu mêmè, mêmè kusambila kabidi ne: “Mukalenge, piikalabi ne ngwêwè, swaku walukile cyakabidi wakule naanyi.” Mvwa mbala Bible wanyi kubangila anu pâmvwâ kumbelu ku cipatukidi cya mu lupitaadi, nenku nkaavwa mubale mu 1 Yone 4 ne: “Bananga, kanwitabuujî nyuma yônsò cyanaana to, kadi nuyiteete nê nya kudi Nzambi.”

Mvwa mumanye ne nyuma kampanda uvwa mummwenekele, nenku pângâasambidi yêyè kummwenekela cyakabidi. Nenku kungenzekalabi anu bu ne mbanguumushe bujitu bwa livres de poids binunu bibidi [kilô 907] mu musuuka wanyi. Mêmè kutupika kwimanyina kuulu kadi kuvukuta lubilu too ne kwetu kumbelu, biine abi byenze anu bu ne mvwa nyeema lubilu mwikale gendela mu lupeepa.

Maamu kunkonkaye ne: “Bill, cidi cikwenzekele ncinganyi?” Mêmè kumwandamuna ne: “Ncyêna mumanye to, kadi bushuwa budi ne ndi ndyumvwa bimpè ne mupeepele.” Ncivwa mwa kushaala kabidi mu nzubu amu to. Bivwa bikengela anu kupatuka kuya ngenda nyeemakana mbilu.

Ke mêmè kumanya mwaba awu ne Nzambi Yêyè muswe bwa mêmè kuyiisha, uvwa mwa kungondopa, pa nanku mêmè kuya ku ekeleeziya kampanda kuvwabo biitabuujî dilaabangana dya maanyi, ke mêmè kwondopiibwa anu pa cibanza. Ke mêmè kumona mwaba awu ne bayiidi bavwa ne cintu kampanda cidi ciibûngi cya bambi leelu ewu kabayi naaci nansha. Bayiidi baakabatijijibwa ne Nyuma Mwîmpè ne pa nanku bavwa mwa



kwondopa babeedi ne kwenza bishima bya bukole mu Dinà Dyende. Pa nanku mémè kubanga kusambila bwa dibatiiza dya Nyuma Mwîmpè ne mémè kudipeta.

Dingà dituku paanyima paa ngondo mitwe ku isambombo, Nzambi kumpaye dijinga dya mwoyi wanyi. Yèyè kwakula naanyi munda mwa bukênkè bunene mwikale ungambila bwa kuya kayiisha ne kasambidila babeedi ne Yèyè mwikale mwa kubondopa nansha disaama dyabo diikale dya bishi. Mémè kubanga kuyiisha ne kwenza cyakangambilaYe bwa kwenza aci. Kaa, mulunda wanyi, ncyêna mwa kubanga dikulondela byônsò bidi byenzeke to: Mésù a bampofò mmatabale. Balema mbendè. Kansere yàbûngì mmyondopiibwe ne bishima bya mishindu yônsò mbyenjibwe.



Dingà dituku kwinshi kwa mùsèèsù wa Spring Street, mu Jeffersonville, Indiana, paanyima paa ditabuluja dya mbingu ibidi, mvwa munkaci mwa kubatiiza bantu 130. Divwa dituku dya luuya lukole dya ngondo wa mwandamukulu, nenku pavwa bantu batwe ku binunu bisatu mwaba awu. Nkaavwa anu ne mbatiize muntu wa 17, ke dyakamwe mémè kuumvwa cyakabidi kaadiyi katekete menemene aku kamba ne: “Banduluka.” Kuulu kuvwa kwenze mùtù cyamu cya kabanda mu dituku adi dya luuya lukole dya ngondo wa mwandamukulu. Katuvwa bapeteku mvula nansha wa kânà to kukaavwa mbingu mitwe ku isatu. Mémè kuumvwa kabidi diyi adi, nenku musangu mwisàtù ewu kwambadi kabidi ne: “Banduluka.”

Mémè kubanduluka kadi kulwaku mutooto munene ubalakana uumukila muulu, ûnkaavwà mumonemone misangu yàbûngi kumpala kadi nciyiku munwãmbilebù to. Misangu yàbûngi nkaadi mwambilembile bantu mùtù mutooto awu umweka kadi biikale anu bafwa mu tuseku bamba ne: “Bill, aci wêwè’s ngudi udifwanyikijilaci. Anyi pàmwãpa uvwa uloota.” Kadi Nzambi atumbe, bwa ewu musangu Yéyè kudileejaYe mumweneke ku mèsù a bantu bônso, bwalu mutooto awu wakapwekelela panshi menemene mwaba úmvwà awu mu mushindu wa ne ngâkapanga ne mwa kwakula. Paanyima paa ndambu wa tusunsukila twa dibà tumane kupita, mémè kwela lubila lukole ne bantu bààbûngi kubandulukabo e kumonabo mutooto awu anu kumutu kwanyi menemene. Bamwe kufwabo cipuuka pavwa bakwabo beela mbila ne bakwabo bavukuta mbilu baya. Pashiishe mutooto kwalukilawu muulu, ne kaaba kaakuumukawu kavwa kaa cipaapu cya makàsà matwe ku asambombo [centimètres 15,24] mu nseke yònsò, nenku kaaba kiine aku kushaalaku kanyungakanangana ne kavwanduluka byenze bu ne mmavwala atuuta. Kwakenzeka kaaba kiine aku kaaditutu kakese katooke, ne mutooto awu wakaangaciibwa mu kaaditutu kakese aku.

### **Anu muvwa Yone Mubatiiji, muprofeta ewu wakashindikiibwa mu màyi a Dibatiiza.**

Bikeena-kumona kutungunukabi. Bavwa bamwambila kudi balombodi nende baa ekeleeziya ne bikeena-kumona abi kabivwa bya kudi Nzambi to. Bavwa bamwambila ne nyuma mubi kampanda nguvwa mumukwate. Aci ke kumutacishaci bikole mu meeji. Bujitu kwikalabu bupite kabuciyi dyambula to, ke kuyaye mu mwaba wa cipeela bwa kuya kapeta Diswa dya Nzambi. Ukaavwa mudifile bikole mu mushindu wa mudicipe bwa kayi mwa kwalukila kayi mupete dyandamuna to. Muvwa mmwamwa, mu kazubu kaa kale muvwaye uyaayaaya bwa kwela mateyi mwamwa, ke mwakamupeela Mwanjelo wa Mukalenge mudimu wakatumiibwaye naawu bwa kwenza. Mu maalu makwabo, Mwanjelo wakamwambila nenku: “Wêwè mufikishe bantu

ku dikwitabuuja, ne mwikale ne meeji matooke paudi usambila, kakwakwikala cintu nansha cimwe cyakandameena ebe masambila, nansha kansere kiine.”

**Mpatà yônsò kuumukayi. Ukaavwa mpindyewu ne mudimu mumutuma naawu nenku ke kutungunukaye ne dikima dyônsò. Ditabuluja dya dyondopa dikaavwa dibange.**

Binunu nkama bya bantu bavwa baya mu tumpanye twa Branham. Binunu bya bantu bavwa bondopiibwa mu Dîna dya Mukalenge Yesu Kilisto. Batangadiki bakwabo bu mudi Oral Roberts, T.L. Osborn, ne A.A. Allen kabaakajanguluka to baakalonda Mwaneetu Branham kadi kubangabo abo matabuluja a dyondopa. Mukalenge kulokeshaye mabenasha Ende mu mushindu wa kacya. Cyanza cya dyondopa cya Yesu Kilisto cyakalenga bantu Bende musangu ewu kabidi.

“Ntu anu ndila mwadi wa disanka bwa dipà dya Nzambi dya matuku mashaale aa ditumina ekeleeziya wa mwaneetu munanga, William Branham, ne dipà dyende dya dyondopa didi dikemeshangana. Ebu mbwalu budi Nzambi mwikale wenza bintu byàbùngì bipite ne byônsò bitudi mwa kulomba anyi kwelela meeji (Efeso 3.20), bwalu mêmè ewu nцитuku mwanji kumona kacya anyi mubale cintu nansha cimwe ciikale mwomumwe ne mudimu wa bwambi wa dyondopa wa William Branham to.”

Rév. F.F. Bosworth, mutangadiki mwende luumu wa buloba bujima mwikale kabidi umwe wa ku baataatu baakajuula dingumba dya Assemblées de Dieu kabidi ne nkwaka wa Mpenta wa leelu ewu.

“Musangu kampana, twàkabandila pavwaye wakula ne muntu mulume mulaadika mu kalaalu kaa

babeedi. Kumpala kakuvwaku cimanyinu nansha cimwe cya dyandamuna dyetu dya meeji edi dya kudi muntu awu to. Dyumvwija dyakalwa pashiishe kudi mukajende uvwa mwimane pabwipi nende ne, muntu awu kavwa anu ufwa kansere nkaayaku to; kadi uvwa mpudimaci ne kavwa mwa kuumvwa bivwabo bamba to.

Ke mwaba awu Mwaneetu Branham kwambaye ne bivwa bikengela bwa muntu awu kupetaye lumvu lwende bwa wamona mwa kumuleeja bwalu bwa dyondopiibwa dyende ku kansere. Kwanji kupitaku katanci kaa disambila. Dyakamwe muntu awu kubangaye kuumvwa! Mamata manene a binsonji kuzololokawu pa matama a muntu awu uvwa diloolo dijima adi mpala kayiku mwa kuleeja muvwaye udyumvwa cibi mupuwe anu nyanyanya. Wakateeleja ne ntema yònsò pavwaye ulondelangana bwa disungidiibwa dyende ku kansere.”

Rév. Gordon Lindsay, mufundi wa dipoko, mwambi, ne mujuudi wa Institut Christ Pour Les Nations.

“Mwaneetu Branham kwambaye ne: ‘Congressiste ewu wamanyi kwondopiibwa.’ Mwoyi wanyi kutupika ne disanka. Mémè kupatuka kwaka e kwitaba Mukalenge bu Mwondopi wanyi. Mémè kwimansha mabaya aanyi a balema... nenku bavwa mu citupa cya kwinsi kwa Dyulu kufiikabo munda!”

William D. Upshaw, Congressiste wa États-Unis (1919-1927), wakafila mpala bwa kumusungulabo bu Mfumu wa ditunga wa États-Unis mu 1932. Mucibukile panshi kubangila paakadishindaye ne kucibuka nyima pacivwaye mwânà. Ukaavwa ne bidimu 84 paakondopiibwaye ku kantu ne kantu ku dimusambidila dya Mwaneetu Branham, paanyima paa yêyè mushaale mucibukile

panshi bidimu 66. Kaakapetaku dijinga dya dikalu dya balema anyi mabaya a balema to matuku ende ônsò akashaalayi ne mwoyi.

“Mvwa mu bulaalu kacya ngela cyâdi muulu kukaavwa bidimu 8 ne ngondo 9 mwikale ne disaama dya cyâdi, ne bangangabuka bakaavwa bandekele. Bikaavwa bwalu bukole bwa mêmè kwikala ne livres de poids 50 [kilô 23] yetu eyi ne byôbi biine bikaavwa bimweke anu bu ne ditekemena dyônsò dikaavwa diye. Nenku ke Révérend WM. Branham, muumukile ku Jeffersonville, Indiana, ku ntanta wa miles 35 [kilomeeta 56] ne kwetu kumbelu, bilondeshile cikeena-kumona civwaye mumone cya kânà kaa mukooko bakakwate mu cipeela kiikale kadila kateela “Milltown” (Ke mwaba mene ûndi mêmè musombele). Mwaneetu Branham kavwaku mwanji kufika muneemu emu kacya anyi bamumanyeku kudi muntu wa muneemu emu to. Paabwediye, kuntentekelaye byanza ne kunsambidilaye, usoka dinà dya Mukalenge wetu munanga Yesu pambidi paanyi. Ke kwenzabi anu bu ne Cintu kampana cyakankwata, nenku mêmè kujuuka dyakamwe mwikale ngela Nzambi twasakidila bwa bukole Bwende bwa dyondopa. Nkaadi mpindyewu mwimbi wa cisanji cya piànô mu ekeleeziya wa ba-Baptistes muneemu emu.”

Georgia Carter, Middletown mu Indiana, wakondopiibwa ku disaama dya cyâdi mu 1940 ne kaakadisaamaku kabidi dituku dikwabo nansha dimwe to mu nsômbelu wende. Yêyè ncileejilu cya bantu binunu makumi batu bondopiibwe mu mudimu wende wa bwambi ne bacidi anu benda bondopiibwa too ne leelu ewu.



# DIKUNJI DYA KAPYA

Mwaneetu Branham utu misangu yâbûngì uumvwija Dikunji dya Kapyâ kampanda dya bwena ditu dishindike mudimu wende wa bwambi adi. Divwapu ku dilediibwa dyende, baakadimona kudi bantu binunu ku mwelelu wa Musulu wa Ohio, ne divwa dyenze bu divwa dyenda dimulonda kwônsò kuvwaye uya. Mu cidimu cya 1950 ke mwakapa Mukalenge beena kwitabuuja ne beena bupidya cileeji cya mwomumwe cya ne Dikunji dya Kapyâ divwa ne muprofeta.



Diloolo adi dikokangana dya ku luseke dyakenzeka mu Sam Houston Coliseum. Mwaneetu Branham uvwa ulombola ditabuluja dya dyondopa divwa ditangalake ditunga dijima. Mabenesha a Mukalenge Yesu avwa munkaci mwa kupongoloka cyenze bu mvula pa madimi a nyuma a blé. Kadi bimanyinu binene ne maalu a kukema kabyakalwa kakuyi kadyuwu to. Anu mutubi misangu yônsò, mwena lukuna e kujuulaye mulwishi. Makole abidi awu kutwilanganawu mu Houston mu Texas, ke Mwanjelo wa Mukalenge Yêyè mwine kudituulukilaye bwa kudilwila mvita ayi.

Binunu bya bantu bakaavwa bamane kwikalapu bwa kudimwena bishima bivwa bûngì kabuyi kubala bivwa byenda bilonda mulume wa Nzambi ewu. Dituku kumpala, kasumbu kaa bambi baa pa kaaba aku baakeela muprofeta kadyombo biikale balomba muyiiki

wa dikokangana pa dyondopa dya kudi Nzambi, kadi kadyombo aku kuponaku mu byanza bya mwena dya muprofeta wa kale uvwa wamba maalu wambilamu, ke Révérend F.F. Bosworth. Beena mpatà bààbûngì ke kubatwabo nyama ku mikolo kudi mwambi kampanda wa ba-Baptistes wa pa kaaba aku uvwa mwikale mwena mpatà wa mukana mutupu pa bidi bitangila dyondopa dya kudi Nzambi. Dikokangana divwà dilondà bôbò kuditangalaja mu bibejibeji ne lukasa lwônsò, byôbì kupatuka ne cyena bwalu eci ne: *“Nekwikale Kafwafwayi Kaa Maalu A Nzambi Pa Dîbà 7 wa diloolo Leelu Mu Sam Houston Coliseum.”*

Mwena mpatà awu kufutaye mukwaci wa fôtô, Ted Kipperman wa Studios Douglas, bwa kwikalaye ukwata fôtô dîbà dya dikokangana adi. Diloolo adi, baakakwata fôtô Mwaneetu Bosworth mwimane mu didipwekesha dyônsò pavwa mwena mpatà awu udyà ma-pôzè mwenze bu udi ukwacishangana bwôwà; musangu mukwabo mwimane ne munu wende mufunkuna mwîsù mwa mukulumpe wa bupwekele awu.

Muyiiki wa dikokangana mmwenze anu ubanga, Révérend Bosworth kujaadikaye ne lukasa lwônsò bulelela bwa dyondopa dya kudi Nzambi ne bileeji bya mu Mifundu, ne bwa kubenga kushiya mpatà, kulombaye bônsò bakaavwaku bondopiibwe ku mateketa bwa bajuukile kuulu. Binunu bya bantu kujuukilabo kuulu. Paanyima paa bavwa bondopiibwe bamane kusomba mu nkwaso yabo, kulombaye bônsò baakondopiibwa ku dyondopa dya kudi Nzambi biikale bantu baa mushinga ne biikale bidimba bya dingumba dya mwine mulumyana awu bwa kujuukilabo kuulu. Bantu nkama isatu biikale bidimba bya ekeleeziya awu kujuukilabo kuulu bwa kuleeja patooke ne maleela ônsò luse luvwa Mukalenge Yesu mubënzèle.



Ke kadyombo kufuminaku mpindyewu kudi mwena mpatà awu. “Mwondopyanganyi mwine wa kwa Nzambi awu apatukile mwaba ewu tǔng. Alwe ěnzè tǔng.” Ke Mwaneetu Bosworth kutookeshaye bîmpè maalu wamba ne Yesu ke Mwondopi umwepele wa kudi Nzambi, kadi ngaakwilu wa dipota wa mwena mpatà awu kwenza anu mutungunuke. Bwa kumana kumana, ke Mwaneetu Bosworth kulomba Mwaneetu Branham bwa kubandaye pa cibumba apu. Yêyè kwitaba ku dibiikila adi munkaci mwa mbila ya dimutwa naayi nyama ku mikolo.

Muprofeta, mûle tente ne Nyuma Mwîmpè, kufilaye dyandamuna didi dilonda edi ne:

Mêmè ncyêna mwa kwondopa muntu nansha umwe to. Cîndi ngamba nshindika ncyeci. Pâmvwà mwânà wa mu diboko mulela mu Ditunga dya Kentucky mwamwa, bilondeshile bidi wanyi maamu munanga mulonde, ne bidi bishindikiibwe mu nsòmbelu wanyi mujima, kwakalwa Bukênkè kampanda mu cibambalu cya kazubu kaa kabutabuta kaa kale aku, mwaba uwaku awu, kakayi nansha ne nshaamenda panshi, kakayi nansha ne dididiishi diine, bavwa anu ne kaacintu kakwabo kaa kale bu dididiishi kaaba aku, kenze bu kaaciibi kakese, ke kukunzululabo bu pa dibà itaanu wa dinda, ke Bukênkè ebu kubwelabu bwenze cijengu anu pakaavwa bufuku bwamba kucya apu. Kubangila anu pa diine dibà adi, Budi naanyi. M’Mwanjelo wa Nzambi. Mmusambakeene naanyi yêyè mwine kukaadi ndambu wa bidimu. Mu nsòmbelu wanyi mujima, Yêyè ukaadi mungambile maalu akaadi menzekenzeke, ne mêmè ewu nkaadi mualondelangane anu mutuYe muangambile. Nenku ndi ngela muntu yònsò kadyombo nansha bamwamba ne nganyi nansha yêyè mwikale penyi, bwa kuyaye mu cimenga mùntù mukolele amu, anyi mwaba mukwabo wònsò, bwa ne diyì dikaadiku dyambiibwe mu Dinà dya Mukalenge, ne kaditu dikumbane anu patapata mushindu utudi dyambe ne nebyenzeke.

Paanyima paa yêyè mumane kwamba mêyì awu, Nyuma Mwîmpè kwicikila pa cibumba cya cyambilu, nenku mukwaci wa fòtô musaluke kadi kukwataye fòtô. Mwaneetu Branham kuumukaye pa cibumba cya



cyambilu apu mwikale wamba dîyî dipeepele edi, kadi diikale dya ciprofeta ne: *“Nzambi ke wafila bujaadiki. Mémè ncyakwambaku dîyî dikwabo to.”*

Àsòsà wa Mukalenge Kipperman kuyaye ne lukasa lwônsò bwa kasukula fôtô ayi bwa nguumu ya dinda divwa dilonda. Ke yêyè kumona kaacintu kaa pabwaku paaluye kupatula fôtô wa kumpala mu bwanga. Yêyè awu, anu muvwa mikwabo itaanu yavu kulonda, uvwa munda mutupu. Kadi kudikwataye cyanza pa mwoyi ne kuponaye mutwe cyâdî panshi paaluye kupatula dibеji dya ndekeelu mu bwanga. Mwômò amu, pa fôtô wa ndekeelu awu, pavwa Dikunji dya Kapyà mu mushindu wa dimweneke ne mèsù diikadile lwa pamutu paa muprofeta wa Nzambi, William Marrion Branham.

**Bânà baa Izaleela baakadimwena Dikunji dya Kapyà dyenda dilombola Môsà, ne bantu baa dituku dya cyena leelu edi mbadimwene Dikunji dya Kapyà dimwedimwe adi diikale dilombola muprofeta mukwabo.**

Kutumabo lukasalukasa fôtô awu kudi George J. Lacy, Mukenkeci Mupiluluke wa Documents idibo beela Mpatà bwa F.B.I. wa États-Unis, yêyè kujaadika ne fôtô awu mmulelela ku mmwenenu wende wa muntu mupiluluke. Document udi mbulamataadi mwitabe udibo bapatule kudi Mukalenge Lacy mupatule nyêyè ewu pa dibеji didi dilonda edi.

Eci nkumpala menemene kwa bidikalwila anyi byamu bya fôtô bya ditwa minu kwikalabi kwökò, ne kacivwa mwa kupeta dyumvwija dya ku mishindu kana yônsò idi mimanyike kudi mamanya eyi to, pa kuumusha ne kuvwa Bukênkè bulelela pamutu paa William Branham. Leelu wa Ndaaya ewu fôtô umweumwe ewu badi mwa kumumona mu Nzubu wa Dibadila Mikanda wa Congrès wa États-Unis, mu cimenga cikulu cya ditunga, Washington DC.

George J. Lacy  
Mukenkeci wa Documents Idibo Beela Mpatà  
Shell Building  
Houston, Texas

Dya 29, ngondo wa kumpala, 1950

MULUBU NE MMWENENU

Bwa: Ciibuloji cidibo beela Mpatà

Mu dya 28 wa ngondo wa kumpala wa 1950, ku dilomba dya Révérend Gordon Lindsay, uvwa uleeja mpala wa Révérend William Branham wa mu Jeffersonville, Indiana, ndi mupete bantumine kudi Studios Douglas wa mu Avenue Rusk nombra 1610 mu cimenga eci, film wa fôtô wa 10,6x12,7 cm mu ciibuloji ne mumana kusukula. Film ewu udi ne cya kwikala mwenza kudi Studios Douglas mwikale wa Révérend William Branham mu Sam Houston Coliseum mu cimenga eci, mu cikondo cyafikiye muneemu mu citupa ciibîdi cya ngondo wa kumpala, wa 1950.

DILOMBA

Révérend Lindsay uvwa mulombe bwa mêmè kwenza dikipeta dya mu maalu a mamanya dya ciibuloji citudi bambe kuulu eku eci. Uvwa mulombe bwa mêmè njaadike, bu byôbî mwa kwenzeka, mu wanyi mmwenenu ne mmwômò anyi kî mmwômò bwa ne ciibuloji eci mbacilongolole anyi “bacyënzùlùle” mu mushindu kampanda, bifumine ku disukula dya film, bifwanyine kwikala bifile kaamushoonyi kaa bukênkè kamweka kenze bu kafulu kaa bukênkè kaa bansantu pamutu pa Révérend Branham.

DIKENKETA

Dikipeta dya ne mèsù cyanaana ne dya ne cyamu cya microscope ne dilonga diine mbyenjiibwe pambidi mu nseke yônsò ibidi ya film, uvwa mwikale Eastman Kodak Safety Film. Ndi mukenkete nseke yônsò ibidi ya film ne bukênkè bupicisha mu kasengulu kaa bukênkè bwa ultraviolet ne fôtô miine ya infrarouge mmpatula anu pa film mwine awu.

Dikenketa dya ne cyamu cya microscope kî ndifike ku disokolola ne mbalongolole film kaaba kampanda anyi kansanga ku mushindu kampanda wa dilongolola udibo naawu kudi bangendaamushinga to. Kabidi, dikenketa dya ne cyamu cya microscope kî ndifike ku disokolola dinyangakaja kampanda pa kubwejakaja manga a mishindu ibidi munda anyi ku myelelu ya kaamushoonyi kiine kaa bukênkè aka to.

Dikenketa dya ne bukênkè bwa ultraviolet kî ndifike ku disokolola ne kuvwa bilaabu kampanda bya kwa patupu, anyi cipeta cya dituutuka kampanda dya manga ku nseke yônsò ibidi ya ciibuloji, cidi cifwanyine kwikala cyenzeje kaamushoonyi ka bukênkè aku, bifumina ku disukula dya ciibuloji to.

Nansha fôtô wa infrarouge pende kî mmufike ku disokolola cintu kampanda cifwanyine kuleeja ne mbalongolole cikampanda anyi cikansanga pa film to.

Nansha dikenketa diine paadi kî ndifike ku disokolola cintu kampanda cifwanyine kuleeja ne ciibuloji ciine eci civwa cilamakaja anyi mbiibuloji bibidi byambakaja nansha.

Kî nkupeteke cintu nansha cimwe cifwanyine kuleeja ne kaamushoonyi kiine kaa bukênkè aka nkenjiibwe dîbà dya mudimu wa disukula nansha. Anyi kî nkupeteke cintu kampanda cifwanyine kuleeja ne kî mbacisukule mu mushindu ùtù mulombiibwe ne ùtù mwanishiibwe nansha. Kî nkupeteke cintu nansha cimwe mu dipalakana dya makênkè makole avwa kâyi mu dyumvwangana nansha.

### M M W E N E N U

Mwimanyine pa dikenketa ne dilonga bidi kuulu eku ebi ndi ne mmwenenu mushindika ne ciibuloji cidibo bafile bwa kukenketa eci, kacivwa cilongolola anyi cilamakaja anyi biibuloji bibidi byambakaja nansha.

Kabidi, ndi ne mmwenenu mushindika ne kaamushoonyi kaa bukênkè kadi kamweka kumutu kenze bu kafulu kaa bukênkè kaa bansantu aku mbakënzè kudi bukênkè budi bulenge ciibuloji.

Bifidiibwe ne kaneemu kônsò,



# MAALU MASOKOKA MABUULULA

Anu ku ntwadijilu menemene mu mudimu wa bwambi wa Mwaneetu Branham byakamweka bitooke tòò ne ndongolwelu wa cyena mangumba wakajuudiibwa mbwa kutwa malongolodi a ntendeleelu nyama ku mikolo, kabiyi bwa kutwa Evanjeeliyo mulelela nyama ku mikolo to. Mwaneetu Branham yêyè uvwa witabuuja Bible ku Mwaku ne ku Mwaku, ne kavwaku mwa kudya cibanga to, nansha byôbî ne bavwa mwa kumwipata kudi biinende, balunda, anyi beena dikù dyende.

Pacivwaye cidimba cya Église Missionnaire Baptiste, bôbò kumwambila bwa kujidilaye bambi bakaji. Nansha nanku, yêyè uvwa mumanye Mifundu yônsò bîmpè menemene. 1 Timote 2.12 udi wamba anu patooke ne: *“Kadi ncyêna nganyisha bwa mukaji kulongeshaye to, anyi bwa kwangataye bukookeshi kumutu kwa mulume, kadi bwa kwikalaye mupuwe,”* ne 1 Kolinto 14.34 udi wamba ne: *“Bakaji beenu biikale bapuwe mu ekeleeziya: bwalu kabyena byanyishiibwe bwa bôbò kwakula...”* Eci kacivwa cintu cya cilwisha bakaji to, kadi Bible uvwa mwambe bwalu abu anu bu mùdibu. Paakamwambilabo bwa yêyè kusungula, kavwa ne mushindu wa kudya cibanga to kadi wakapatuka mu ekeleeziya.

Kî ngawu Mufundu nkaayaawu uvwa mangumba awu mapange mapangilemu to. Mukalenge wakabuulwila Mwaneetu Branham bulelela pa dibatiiza dya mu mâyi. Mmunyi muvwa Yesu mwa kutuma diyî ne: *“Nanku ndaayi, nulongeshe bantu baa matunga ônsò, nubabatiize mu dîna dya Taatu, ne dya Mwânà, ne dya Nyuma Mwîmpè,”* padi dibatiiza dyônsò didibo balonde mu Bible

diikale mu Dîna dya Yesu? Mupostolo Peetelo wakatuma dîyi mu Byenzi 2.38 bwa *kunyingalala ne kubatiijibwa mu Dîna dya Mukalenge Yesu Kilisto*. Mifundu idi ikwata mudimu mu bwobumwe bupwangane, kadi bivwa bikengela muprofeta bwa kubuulula bwalu busokoka ebu ne: “Taatu” kî ndîna to, “Mwâna” kî ndîna to, ne “Nyuma Mwîmpè” kî ndîna to. Anu mudibi ne muntu umwepele udi taatu wa bâna, mwâna wa balume wa baledi bende, ne mwanaabo wa balume kudi bâna baabo baa tatwëndè ne mamwëndè, nansha nanku dîna dyende kadyena “taatu,” “mwâna,” anyi “mwaneetu” to. Taatu, Mwâna, ne Nyuma Mwîmpè mmyânzù bwa Dîna dya Yesu Kilisto. Maataayi 28.19 ne Byenzi 2.38 byakalwa bilulamangane mu mushindu mupwangane.

Nansha mpekaatu wa ku cibangidilu mu Budimi bwa Edena wakabuuludiibwa, kacyi bu ne ndidya dya cimuma kampanda to, kadi cintu kampanda citambe bubu. Mmunyi muvwa didya dya kapese kaa cimuma kampanda mwa kubuulwila Adama ne Eva ne bavwa butaka? Kacyena cyumvuka anu ciikale cya meeji to. Ndipetangana kaayi didi pankaci paa cimuma cya pomme ne butaka? Muprofeta wa Nzambi wakabuulula anu bitooke tòò bwalu busokoka ebu.

Banjelo badibo bambe mu Bwakabuulwibwa nshapita 2 ne 3 abu mbanganyi? Mênà abo’s adi mwa kuumvuka mamanyike bîmpè.

Babandi baa pa tubalu bàdi bàkèmeshà baa mu Bwakabuulwibwa nshapita 6 aba mbanganyi? Badi ne cintu cya mwomumwe ciikale cya mushinga wa bûngi.

Ditunga dya États-Unis mbaditeeleku mu Mukanda wa Bwakabuulwibwa anyi?

Bantu 144.000 baakasungidiibwa mu nshapita wa 7 aba mbanganyi?

Ndumba munene wa mu nshapita wa 17 ewu nganyi? Ngiikadilu wende ne maalu masokoka ônsò aa akabuuludiibwa mu Mukenji wa muprofeta wa bukole mutuma kudi Nzambi ewu.

Kî ng'anu bishima bûngi kabuyi kubala ke byakafila mulume ewu to, kadi maalu masokoka avwa mabuta mu Bible munda mwa bikondo byônsò akabuuludiibwa kabidi mu mudimu wende wa bwambi. Byakamweka bitooke tòò ne muprofeta ewu mmuujje Mifundu yâbûngi misakidila pa wa Maalaki 4.

***Bwakabuulwibwa 10.7: Kadi mu matuku a dîyi dya mwanjelo wa mwandamutekete, paabangaye kwela mpungi, bwalu busokoka bwa Nzambi budi ne cya kujika, bu mwakambilaye basadidi bende baprofeta.***

Dîyi didi munkaci mwa kwela lubila diikale dyambila baa pa buloba bwa kupatukabo mu mangumba ne kwalukila ku Dîyi dya ku cibangidilu dya Nzambi. Muntu ne muntu wa kutudi udi ne mpunga umweumwe awu wâkadibò nende kudi Peetelo, Yakobo, ne Yone. Twêtù tudi ne dyêsè dya kubadiibwa munkaci mwa basungula banyaabanya baa Nzambi badi kabayi bafwanyine kutwila malongolodi a ntendeleelu a dituku dya leelu ewu cinù to.

Mifundu ya Cijila idi ilonda maalu a nsòmbelu ne byenzedi byabantu baakendane Nzambi ne baakalaabiibwa bikole ne Nyuma Wende mu mushindu wa ne baakamba EMU MMUDI MUKALENGE WAMBA, ne mêyi abo akashindikiibwa kudi bimanyinu ne maalu a kukema bivwa kabiyi mwa kupangila to. Bavwa baprofeta baa Nzambi, ne Dîyi dya Nzambi ditumina lukongo lwabo alu.

Bikondo mbishiilangane mpindyewu ne muvwabi musangu uvwa Yesu panwapa awu anyi? Balombodi baa ntendeleelu mbaakaMupoopela pa nkuruse. Bayiidi



bavwa banyaabanya munkaci mwa ndongolwelu munenaanenaale wa ntendeleelu. Bôbò bavwa babiipata, babaseka, ne ndekeelu wa byônsò babashipa bwa dikandameena dyabo dya ndongolwelu wa cyena mangumba uvwabo biitaba kudi bantu bábûngî. Twêtù tudi bafwanyine kubenga kushipiibwa bwa bitudi twitabuujja leelu ewu, kadi bulelela tudi tukengeshiibwa. Anu muvwa Bafaalesa ne Basadoka, kabeena mwa kubenga kwitaba bishima byakafila mudimu wa bwambi wa Mwaneetu Branham to mu mushindu wa ne badi banyeemena ku mishindu mikwabo ya ditulwisha naayi. Nudi mwa kuumvwa bamba ne yêyê uvwa muprofeta wa mashimi, mulombodi wa kasumbu kaa bantu bapambuke; anyi cintu cibi cipite aci. Mu bushuwa bwa bwalu, yêyê uvwa mulume wa Nzambi mudipwekeshe mwikale ukandameena ne bukole bwônsò bukontononyi bwa kashendende budi naabu mangumba ne tusumbu twa bantu bapambuke pa bantu baa Nzambi. Mushindu umweumwe awu ngwakalwishabo naawu Yesu paakakandameenaYe mêyî abo maswika ne bilele byabo.

Nzambi wakatwa mushinga budiswile bwa Mwaneetu Branham bwa kwitabuujja Dîyî dyônsò dya mu Bible, ne Yêyê udi munkaci mwa kukwata mudimu ne mudimu wende wa bwambi bwa kufikisha miliyô ya misuuka kudi Yesu Kilisto. Leelu ewu, Dîyî dya Mwanjelo wa Mwandamutekete didi munkaci mwa kwela lubila lukole anu mùtùDi dyeleele. Bantu batwe ku miliyô ibidi buloba bujima mbiitabuujje Mukenji wa Mwaneetu Branham. Eci cididi mwa kwikala anu bantu banyaabanya pa binunu bibidi bya miliyô bya badi badyamba ne mbeena Kilisto, kadi ndîbà kaayi dikaadiku bantu baa Nzambi kabayi banyaabanya?

Tudi ne mayiisha makwata pa mikaba ya mêyî mapite pa 1.200 miikale ne Dîyî dyakambabo mu ciprofeta mu

Bwakabuulwibwa 10.7 ne nedilwe. Diyiisha ne diyiisha dya kudiwu didi dikangula maalu masokoka a Nzambi mapite. Diine Dîyi adi ndituule dipuwe pawikala muswe kuDiteeleja.

## DISUNGULA DIDI ANU KÛDÌ AKU

*Dîbà nansha dimwe mêmè ewu nciwu ntwadilaku bantu mukenji bwa bandonde, anyi bashaale beena ekeleeziya wanyi, anyi bwa kubanga bulunda anyi bulongolodi kampanda to. Kacya nciwuku mucyënzè ne ncyakucyenzaku mpindyewu to. Aanyi meeji kaena ku bintu abi nansha, kadi aanyi meeji adi nangananga ku bintu bya Nzambi ne bantu, nenku mêmè mwa kukumbajaku cintu cimwe bidi mwa kunsankisha. Cintu cimwe ciine aci ncyakumona malanda malelela enzeka pankaci paa Nzambi ne bantu, mudi bantu balwa bifukiibwa bipyabipya mu Kilsto, bûle tente ne Nyuma Wende ne biikale ne nsòmbelu ulondangana ne Dîyi Dyende. Ndi njinga kunulomba ne kunusengeleela ne kunudimwija bônso bwa kuumvwa dîyi Dyende dya mukana pa dîbà edi, ne kulambula nsòmbelu yenu yônso nkòng kudiYe, anu mudibi ne ndi ne dyeyemena mu mwoyi wanyi ne ndi mudifile mêmè yônso kudiYe. Nzambi anubeneshe, ne dilwa Dyende disankisheku myoyi yenu.*

Rév. William Marrion Branham



# MYABA YA KUBALA

## YESU KILISTO UDI NZAMBI (BUNZAMBI)

EKES. 20.3	Kwikadi ne nzambi mikwabo kumpala kwanyi to.
YESH 9.6	Bwalu bātūlelèdì mwânà, bātūpi mwânà wa balume: ne bukalenge nebwikale pa dikaaya dyende: ne nebabiiikile dīnà dyende ne Mukemeshanganyi, Mubedyanganyi, Nzambi wa bukole, Taatu wa Kashidi, Mukalenge wa Ditalala.
MAAT 1.23	Monaayi, nsongakaji virgo neimite difu, ne nealele mwânà wa balume, ne nebabiiikile dīnà dyende ne Emanuwele, padibo badyumvwija dyamba ne, Nzambi neetu.
YONE 1.1	Ku cibangidilu kwakadi Dīyi, ne Dīyi dyakadi ne Nzambi, ne Dīyi dyakadi Nzambi.
YONE 1.14	Ne Dīyi dyakandamuka mubidi, ne dyakasomba munkaci mwetu, (ne twākamōna butumbi bwende, butumbi bu bwa mwânà wa balume mulela umwe wa Taatu,) mūle tente ne ngāsà ne bulelela.
YONE 4.24	Nzambi udi Nyuma: nenku badi bamukuukwila badi ne cya kumukwila mu nyuma ne mu bulelela.
YONE 5.43	Ndi mulwe mu dīnà dya Taatu wanyi, ne nwēnū kanwena nungakidila to: byalwa mukwabo mu dīnà dyende yēyè, awu nenumwakidile.
YONE 8.19	Pashiishe kumwambilabo ne: Taatu webe udi penyi? Yesu kwandamunaye ne: Kanwena bamanye nī mmēmè, nī n'Taatu wanyi; bu nwēnū bammanye mēmè, nuvwa mwa kwikala bamanye kabidi Taatu wanyi.
YONE 10.30	Mēmè ne Taatu wanyi tudi umwe.
YONE 12.45	Nenku ewu udi ummona mēmè udi umona ewu wākantūma.
YONE 14.8-9	Filipo kumwambilaye ne: Mukalenge, tulejee Taatu, nenku aci cididitwishwa. Yesu kumwambilaye ne: Kwōnsò kūndi neenu eku, kadi wēwè kwena anu mwanji kumanya to, Filipo? Ewu udi mummone mēmè mmumone Taatu; kadi mmunyi mūdī wamba ne: Tulejee Taatu?
YONE 20.28	Ke Tomaase kwandamuna e kumwambila ne: Mukalenge wanyi ne Nzambi wanyi.
BYENZEDI 2.36	Ke bwa cinyi nzubu yōnsò wa Izaleela amanye ne ditwishibwa dyōnsò ne, Nzambi wavwiji Yesu umweumwe awu, yēyè mene unuvwa nwēnū bapoopele pa nkuruse awu, byōnsò bibidi Mukalenge ne Kilisto.
BYENZEDI 9.4-5	Nenku wakapona panshi, ne wakumvwa dīyi dimwambila ne: Shaula, Shaula, udi unkengesha bwa cinyi? Ke yēyè kwamba ne: Wēwè udi nganyi, Mukalenge? Ke Mukalenge kwambaye ne: Mēmè ndi Yesu ūdi ukengesha awu: mbikole bwa wēwè kwikala utuuta miseba mu misongolo.
BYENZEDI 4.5	Mukalenge umwepele, diitabuuja dimwepele, dibatiiza dimwepele.
KOL 1.13-17	Yēyè udi mutusungile ku bukole bwa mīdimà, ne mututentemune mutubweje mu bukalenge bwa Mwanende munanga: Mu yēyè mmutudi ne bupikudi ku mashi ende, too ne difwidiibwa dya luse ku mpekaatu: Yēyè udi cimfwanyi cya Nzambi udi kayi umweneka, mwanaabute wa cifukiibwa cyōnsò: bwalu kudiye nkwakafukiibwa bintu byōnsò, bidi mu dyulu, ne bidi pa buloba, bidi bimweneka ne bidi kabiyi bimweneka, nansha byōbi biikale nkwaswa ya butumbi, anyi mamfumu, anyi makookeshi, anyi makole; bintu byōnsò byakafukiibwa kudiye yēyè, ne bwa bwalu bwende: Ne yēyè ngudi kumpala kwa bintu byōnsò, ne bintu byōnsò bidiku mbwende yēyè.

KOL 2.6-9	<p>Bu munudi baakidile Kilisto Yesu Mukalenge, pa nanku endaayi munda mwende yêyè: Beele miji ne biibakiibwe munda mwende, ne bashindamija mu diitabuujja, bu munutu balongeshiibwe, biikale nudyundadyunda mu kusakidila.</p> <p>Nwadimukaayi bwa muntu kanunyangi ku dilukakaja dya ngenyi ne diseeswisha dya patupu, bilondeshile bilele bya bantu, bilondeshile maalu a mbangilu a pa buloba, ne kabiyi bilondeshile Kilisto to. Bwalu mu yêyè ke mudi musòmbèle kaabujima kaa Bunzambi mu ciikadilu cya mubidi.</p>
EBELU 13.8	Yesu Kilisto udi umweumwe awu makeelela, ne leelu, too ne kashidi.
I YONE 5.7	Bwalu kudi basatu badi bafila bujaadiki mu dyulu, Taatu, Dîyi, ne Nyuma Mwîmpè: ne basatu aba badi umwepele.
BWAKAB 1.8	Ndi Alpha ne Omega, cibangidilu ne ndekeelu, mudi Mukalenge wamba, yêyè udi, ne uvwa, ne udi ne cya kulwa, Wa bukole bwònsò.

## ( DIBATIIZA DYA MU MÂYÌ )

MAAT 28.19	Nanku ndaayi, nulongeshe bantu baa matunga ônsò, nubabatiize mu dîna dya Taatu, ne dya Mwànà, ne dya Nyuma Mwîmpè:
MAAKO 16.16	Ewu udi witabuujja ne ubatiijibwa neasungidiibwe; kadi ewu udi kayi witabuujja neapiishiibwe.
BYENZEDI 2.38	Nenku Peetelo kubambilaye ne: Nyingalalaayi, ne nubatiijibwe muntu ne muntu wa kunudi mu dîna dya Yesu Kilisto bwa dilekelediibwa dya mpekaatu, nenku nenupete kupà kwa Nyuma Mwîmpè.
BYENZEDI 4.12	Kakwena disungidiibwa mu mûngà muntu nansha: bwalu kakwena dîngà dîna dipa bantu mwinshi mwa dyulu, mutudi ne cya kusungidiibwa.
BYENZEDI 8.12	Kadi paakiitabuujabo Filipo uyiisha maalu avwa atangila bukalenge bwa Nzambi, ne dîna dya Yesu Kilisto, baakabatiijibwa, bônsò ne balume ne bakaji.
BYENZEDI 19.3-5	Nenku yêyè kubambila ne: Nenku nwâkabàtijiibwa mu dibatiiza kaayi? Ke bôbò kwamba ne: Mu dibatiiza dya Yone. Nenku Pôlò kwambaye ne: Bulelela Yone wakabatiiza mu dibatiiza dya kanyinganyinga, mwikale wambila bantu bwa ne, bavwa ne cya kwitabuujja ewu uvwa ne cya kulwa paanyima pende yêyè, mbwena kwamba ne, Kilisto Yesu. Paakumvwabo cyôci eci, baakabatiijibwa mu dîna dya Mukalenge Yesu.
EFESO 4.5	Mukalenge umwepele, diitabuujja dimwepele, dibatiiza dimwepele.
KOL 3.17	Nenku cyônsò cinudi nwenza mu dîyi anyi mu cyenzedi, enzaayi byônsò mu dîna dya Mukalenge Yesu, biikale nusakidila Nzambi ne Taatu kupicila ku yêyè.

# MYABA YA KUBALA

## BAPROFETA

NOMBA 12.6	Neuku wakamba ne: Teelejaayi mpindyewu mēyi aanyi: Kwôkô kwikale muprofeta munkaci mwenu, Mêmè MUKALENGE nêndimanyishè kudiye mu cikeena-kumona, ne nêngâkulè nende mu ciloota.
DUT 18.21-22	Neuku biwamba mu mwoyi webe ne: Netumanye munyi dîyi didi MUKALENGE kayi mwambe? Muprofeta yêyè mwakule mu dîna dya MUKALENGE, cintu aci kaciyi cilonde, anyi kaciyi cyenzeke, aci ncintu cidî MUKALENGE kayi mwambe to, kadi muprofeta awu mmucyâmbè mu yêyè: wêwè kumuciinyi nansha.
1 KULOND 16.20-22	Ne paakayabo buumuka ku edi ditunga baya ku ditunga dikwabo, ne buumuka ku ebu bukalenge baya ku cisamba cikwabo; Yêyè kaakaanyishaku bwa muntu nansha umwe kubenzelaye bibi to: eyo, yêyè wakatandisha bamfumu bwa bwalu bwabo, Wamba ne: Kanulengi beela maanyi baanyi to, ne kanwenzedi baprofeta baanyi bibi to.
MISAMBU 105.12-15	Pacivwabo anu bantu banyaabanya bwa bûngi buvwabo; eyo, banyaabanya, ne biikalemu beenyi. Paakayabo buumuka ku edi ditunga baya ku dikwabo, buumuka ku ebu bukalenge baya ku cisamba cikwabo; Yêyè kaakaanyishaku bwa muntu nansha umwe kubenzelaye bibi to: eyo, yêyè wakatandisha bamfumu bwa bwalu bwabo, Wamba ne: Kanulengi beela maanyi baanyi to, ne kanwenzedi baprofeta baanyi bibi to.
AMOS 3.7	Mbulelela ne, Mukalenge NZAMBI kaakwenza cintu nansha cimwe to, kayi mubuwile basadidi bende baprofeta bwalu busokoka bwende.
MAL 4.5	Monaayi, Nênnûtûminè Eliya muprofeta kumpala kwa dilwa dya dituku dinene dya MUKALENGE didi dikwacisha bwôwâ:
LUUKA 1.70	Bu mwakambaye mukana mwa baprofeta bende baa cijila, batu biikaleku kacya dyulu ne buloba byabanga.
LUUKA 24.25	Pashiishe kubambilaye ne: Eyi nwênù bakutakane naanyi nwe, ne baa myoyi mineeme bujitu bwa kwitabuujâ byônsò byakambabo kudi baprofeta:
BYENZEDI 7.52	Nganyi wa ku baprofeta uvwa baatatwênù kabayi bakengeshe? ne baakashipa aba baakadyanjila kuleeja dilwa dya Mwakane Awu; unudi nwênù aba balwe bamutungidî ne bamushipi.
BYENZEDI 24.14	Kadi ndi njikula bwalu ebu kumpala kwebe ne, mu njila udibo bôbô babiikila ne ndipambuka awu, ke mûndî mêmè nkuukwila Nzambi wa baataatu baanyi, mwikale ngitabuujâ bintu byônsò byakafundiibwa mu mikenji ne mu baprofeta:
EFESO 2.20	Ne tudî biibakiibwe pa bishimikidi bya bapostolo ne baprofeta, Yesu Kilisto yêyè mwine mwikale dibwe dinene dya mu ditumba.
EFESO 1.1-2	Nzambi, yêyè wâkaakula misangu yâbûngi ne mu mishindu mishiileshiihangane mu bikondo bishaale ne baataatu ku baprofeta awu, Wavu kwakula neetu mu matuku a ndekeelu aa ku Mwanende, udiye muteeke mupyanyi wa bintu byônsò, ku yêyè kabidi nkwakafukaye buloba;

# BISHIMA/DYONDOPA DYA KUDI NZAMBI

DUT 26.8	Nenku MUKALENGE wakatupatula mu Ejipitu ne cyanza cya bukole, ne diboko dyolola, ne mishindu minene idi ikwacisha bwôwâ, ne bimanyinu, ne maalu a kukema:
BALUMB 6.13	Nenku Gideona wakamwambila ne: Kaa Mukalenge wanyi, piikala MUKALENGE neetu, byônsò ebi mbitukwate bwa cinyi? ne bishima byônsò bitu baataatu beetu batulondele ebi bidi penyi, bamba ne: MUKALENGE kaakatupatula mu Ejipitu anyi? kadi mpindyewu MUKALENGE nyewu wâtùlekèdi, ne wâtùfidi mu byanza bya beena Miidyana.
MISAMBU 103.3	Udi ufwa mibi yebe yônsò luse; udi wondopa masaama ebe ônsò;
YESHAAYI 53.5	Kadi baakamutapa mputa bwa kushipa kwetu kwa mikenji, baakamuzaaza bwa mibi yetu: dinyooka dya ditalala dyetu dyakapona pambidi pende; ne ku mibundabunda yende tudi bondopiibwe.
DANYELE 11.32	Nenku aba badi benza maalu a lwonji bwa kulwisha cipungidi yêye neabanyange ku mêyi a dibalaabidila naawu: kadi bantu badi bulelela bamanye Nzambi wabo nebiikale ne bukole, ne nebênzè byenzedi bya bulobo.
MAAKO 16.17-18	Nenku bimanyinu ebi nebifile badi biitabuuja; Mu dîna dyanyi nebiipate badémons; nebaakule myakulu mipyamipya; Nebakwate nyoka ne byanza; ne bôbò banwe cintu cidì cishipangana, kacyakubenzela bwalu to; nebatenteketele babeedi byanza, ne babeedi nebasangale.
YONE 14.12	Bulelela, bulelela, Ndi nnwambila ne, Ewu udi ungitabuuja mêmè, byenzedi bîndi ngenza yêye neâbyênzè pende; ne neênzè byenzedi binene bipite ebi; bwalu ndi nya kudi Taatu wanyi.
BYENZEDI 19.12	Mu mushindu wa ne baakatwadila babeedi mishwala ne tulùlù bivwa bilenge mubidi wende, ne masaama akabashiila mwaba, ne nyuma mibi yakapatuka munda mwabo.
1 TESAL. 1.5	Bwalu evanjeeliyo wetu kaakalwa kunudi anu mu dîyi nkaayaadi to, kadi mu bukole kabidi, ne mu Nyuma Mwîmpè, ne mu ditwishibwa dyâbûngi; bu munidi bamanye ne twêtù aba tuvwa bantu baa mushindu kaayi munkaci mwenu bwa bwalu bwenu.
YAKOBO 2.18	Eyo, muntu udi mwa kwamba ne: Wêwè udi ne diitabuuja, ne mêmè ndi ne byenzedi: ndeejaaku diitabuuja dyebe didi kadiyi ne byenzedi byebe adi, kadi mêmè nênkuleejè diitabuuja dyanyi ku byenzedi byanyi.
YAKOBO 2.20	Kadi udi muswe kumanya, Wêwè muntu cyanaana ewu, ne diitabuuja didi kadiyi ne byenzedi ndifwe anyi?
YAKOBO 5.14-15	Kudi muntu usaama munkaci mwenu anyi? abiikidishè bakulu baa ekeleeziya; nenku bamusambidile, bamulaabe maanyi mu dîna dya Mukalenge: Ne disambila dya diitabuuja nedisungile mubeedi awu, ne Mukalenge neamujuule panshi; ne piikalaye mwenze mpekaatu, nebamufwileyi luse.
YAKOBO 5.16	Nutondelangane bilema byenu munkaci mwenu, ne nusambidilangane munkaci mwenu, bwa nwamona mwa kwondopiibwa. Diitabuuja dya bwenzèji ne dya kapya dya muntu mwakane ditu ne bukole bwâbûngi.
1 PEETELO 2.24	Yêye mwine wakambula mpekaatu yetu mu mubidi wende yêye mwine ku mucu, bwa ne twêtù, badi bafwe ku mpekaatu, twikale ne mwoyi ku bwakane: yêye mwena ku mibundabunda yende kunwakondopiibwa.

# MYABA YA KUBALA

## NYUMA WA ELIYA

2 BAKAL. 2.15	Nenku paakamumona bânà baa baprofeta bavwa batangilangane ne Yeleko, baakamba ne: Nyuma wa Eliya udi bushuwa pambidi paa Elisha. Nenku baakalwa bwa kusambakeena nende, ne baakiinamija mpala yabo panshi kumpala kwende.
YESHAAYI 40.3-4	Dîyi dya ewu udi wela lubila mu cipeela ne, Longololaayi njila wa MUKALENGE, nululamijile Nzambi wetu cibeeba mu cipeela. Cibandabanda cyônsò necibandishiibwe, ne mukuna munene wônsò ne kakuna kakese nebatamijiibwe: ne myaba mikonyangale neilulamijiibwe, ne myaba ya bimpòkòmpòkò neilandakajiibwe:
MAL. 3.1	Monaayi, nêntumè musanjeela wanyi, ne nealongolole njila kumpala kwanyi: nenku Mukalenge, unudi nwenda nukeba awu, nealwe dyakamwe mu ntempelo wende, musanjeela wa cipungidi mene, unudi nusankila awu: monaayi, yêyè nealwe, mudi MUKALENGE wa bilwilu wamba.
MAL. 4.5-6	Monaayi, nênnûtuminè Eliya muprofeta kumpala kwa dilwa dya dituku dinene dya MUKALENGE didi dikwacisha bwôwà: Nenku neakudimune myoyi ya baataatu bwa kuyitangija kudi bânà, ne myoyi ya bânà bwa kuyitangija kudi baataatu baabo, bwa nci lu kubutula buloba ku mulawu.
MAAT 11.10 (Maako 1.2, Luuka 7.27)	Monaayi, nênnûtuminè Eliya muprofeta kumpala kwa dilwa dya dituku dinene dya MUKALENGE didi dikwacisha bwôwà: Nenku neakudimune myoyi ya baataatu bwa kuyitangija kudi bânà, ne myoyi ya bânà bwa kuyitangija kudi baataatu baabo, bwa nci lu kubutula buloba ku mulawu.
MAAT 11.14	Nenku panwikala baswe kwitaba cyôci aci, yêyè ewu ke Elias, uvwa ne cya kulwa.
MAAT 17.11-12	Nenku Yesu kwandamuna e kubambila ne: Ncya bushuwa ne Elias nealwe dyambedi, ne neakajulule maalu ônsò. Kadi ndi nnwambila ne, Elias awu ukaadi mumane kulwa, kadi kabaakamumanya to, kadi baakamwenzela byônsò bivwabo balongolole. Bya mwomumwe Mwânà wa muntu pende neakengeshiibwe kudibo.
LUUKA 1.17	Nenku yêyè neaye kumpala kwende ne nyuma ne bukole bya Elias, bwa kukudimuna myoyi ya baataatu bwa kuyitangija kudi bânà, ne beena cishiku ku lungenyi lwa baakane; bwa kulongolwela Mukalenge cisamba cidi cidyâkâje.
LUKE 3.4 (Maat 3.3, Maako 1.3, Yone 1.23)	Bu mudibi bifundiibwe mu mukanda wa mêyi a Yeshaayi muprofeta, bamba ne: Dîyi dya ewu udi wela lubila mu cipeela ne, Longololaayi njila wa Mukalenge, nululamije tujila twende.



Bwa kupeta mamanyisha makwabo pa bidi bitangila mudimu wa bwambi wa Révérend William Marrion Branham ne mushindu wa kupeta mayiisha ende, swaku upetangane ne:

**[www.mukenji.org](http://www.mukenji.org)**

**anyi**

Voice Of God Recordings Inc.

P.O. Box 950

Jeffersonville IN 47131 USA

812-256-1177

[www.branham.org](http://www.branham.org)





---

[www.mukenji.org](http://www.mukenji.org)

CILUBA

---